

ইউনিয়ন পরিষদ নির্বাচন-২০১৬

সুজনের মূল্যায়ন ও কার্যক্রমের সংক্ষিপ্ত প্রতিবেদন

১. সুজনের মূল্যায়ন:

নির্বাচন কমিশন ঘোষিত তফসিল অনুযায়ী, বিগত ২২ মার্চ ২০১৬ থেকে শুরু করে ৪ জুন ২০১৬ পর্যন্ত মোট ছয়টি ধাপে সম্পন্ন হলো ইউনিয়ন পরিষদ নির্বাচন-২০১৬। ব্যাপক সহিংসতা, অনিয়ম ও বিভিন্ন ধরনের নেতিবাচক ঘটনাবলীর মধ্য দিয়ে সর্বমোট ৪৫৫৩টি ইউনিয়নের মধ্যে ৪১০৪ টি ইউনিয়নের নির্বাচন অনুষ্ঠিত হয়। এই নির্বাচনের বিশেষত্ব ছিল, এই প্রথমবার রাজনৈতিক দলভিত্তিকভাবে এবং দলীয় প্রতীকে চেয়ারম্যান পদে এই নির্বাচন অনুষ্ঠিত হয়েছে। ভোটকেন্দ্রে প্রতিপক্ষের এজেন্টদের ঢুকতে না দেওয়া বা ভোটকেন্দ্র থেকে বের করে দেওয়া; বুথ দখল করে বা ব্যালট পেপার ছিনিয়ে নিয়ে সিল মারা; চেয়ারম্যান প্রার্থীকে প্রকাশ্য ভোট দিতে বাধ্য করা বা চেয়ারম্যানের ব্যালট পেপার কেড়ে নেওয়া; নির্বাচনী দায়িত্বে নিয়োজিত কর্মকর্তা কর্তৃক ভোটারদের হাতে শুধুমাত্র সদস্য পদপ্রার্থীদের ব্যালট পেপার দেওয়া; নির্বাচনী কর্মকর্তা কর্তৃক ব্যালট পেপারে সিল মারা বা সিল মারতে সহায়তা করা; নির্বাচনের পূর্বে, নির্বাচনকালে ও নির্বাচনের পর ব্যাপক সহিংসতা; ধর্মীয় সংখ্যালঘু সম্প্রদায়ের উপর হামলা; কোনো কোনো এলাকায় ভোট প্রদানে অস্বাভাবিক হার, ফলাফল পাল্টে দেওয়া ইত্যাদি দোষে দুষ্ট ছিল এবারের ইউনিয়ন পরিষদ নির্বাচন। তাই, অনেকেই এটিকে বাংলাদেশের ইতিহাসে সবচেয়ে খারাপ নির্বাচন বলে আখ্যায়িত করেছেন। আমরা সুজন-এর পক্ষ থেকে আমরা প্রথম থেকেই এই নির্বাচনের বিভিন্ন দিক সম্পর্কে নজর রাখছিলাম। সেই পর্যবেক্ষণের ভিত্তিতে আমরা আমাদের মূল্যায়ন তুলে ধরি।

১.১. দলভিত্তিক নির্বাচন: আমরা সুজন-এর পক্ষ থেকে অনেক আগে থেকেই দলভিত্তিক স্থানীয় সরকার নির্বাচনের বিরোধিতা করে আসছিলাম। তবে বাস্তবতা হচ্ছে, দলভিত্তিক এর সপক্ষে আইন প্রণীত হয় এবং উক্ত আইনের ভিত্তিতেই নির্বাচন অনুষ্ঠিত হয়।

দলগতভাবে নির্বাচনের সপক্ষে যুক্তিগুলো ছিল, আমাদের দেশে স্থানীয় সরকার নির্বাচন নির্দলীয়ভাবে হওয়ার কথা থাকলেও তা কমবেশি দলীয়ভাবেই হয়ে থাকে। তাই আইন করে দলভিত্তিকভাবে স্থানীয় সরকার নির্বাচন করলে রাজনৈতিক দলসমূহের দলভিত্তিক নির্বাচনের বিরাজমান প্রবণতা আইনি বৈধতা পাবে। আর একটি যুক্তি ছিল দলগতভাবে স্থানীয় সরকার নির্বাচনের কারণেই নির্বাচনমুখী দলগুলো অতীতের চেয়ে অনেক চাঙ্গা হয়ে উঠবে। কেননা নির্বাচনে অংশগ্রহণ প্রত্যাশী দলীয় সদস্যরা আরও বেশি সক্রিয় হবেন এবং রাজনৈতিক দলের সঙ্গে সম্পৃক্ত নন, নির্বাচনে অংশগ্রহণে আগ্রহী এমন অনেকেই রাজনৈতিক দলে যোগ দেবেন। বিভিন্ন ধরনের স্থানীয় সরকার প্রতিষ্ঠানের নির্বাচন বিভিন্ন সময় হওয়ায় নির্বাচনগুলোকে সামনে রেখে দলগুলো সবসময়ই সরব থাকবে। দলভিত্তিক নির্বাচনে অংশগ্রহণকারী রাজনৈতিক দলসমূহ কর্তৃক প্রার্থী মনোনয়নের বিষয়টি আবশ্যিক হওয়ায় পদ্ধতিগতভাবে প্রার্থী মনোনয়ন করতে গিয়ে দলে গণতন্ত্রের চর্চা বৃদ্ধি পাবে। কারো কারো যুক্তি এমন ছিল যে, নির্বাচিত দলীয় জনপ্রতিনিধিরা দুর্নীতি ও দুর্বৃত্তায়নে লিপ্ত হলে একদিকে যেমন দলকে দায়বদ্ধ করা যাবে, পাশাপাশি তাঁদের কাজের সাফল্যের জন্য দলও বাহবা পাবে। ফলে রাজনৈতিক দল থেকে ভালো কাজের জন্য দলীয় জনপ্রতিনিধিদের ওপর চাপ থাকবে।

দলভিত্তিক স্থানীয় সরকার নির্বাচনের বিপক্ষের যুক্তিগুলো ছিল, **প্রথমত:** দলভিত্তিক নির্বাচন, বিরাজমান দুর্বৃত্তায়িত বিরাজমান রাজনৈতিক সংস্কৃতিকে গ্রামাঞ্চল পর্যন্ত বিস্তৃত করবে। নির্বাচনের পূর্বেই রাজনৈতিক দলসমূহে অন্তর্দলীয় কোন্দল দেখা দেবে। মনোনয়ন বাণিজ্যের বিস্তৃতি তৃণমূল পর্যন্ত ছড়িয়ে পড়বে। **দ্বিতীয়ত:** দলগতভাবে জয়লাভের মরিয়া প্রচেষ্টায় নির্বাচনী সহিংসতা বৃদ্ধি পাবে। ক্ষমতাসীন রাজনৈতিক দলের যে কোনো মূল্যে জয়ের আকাঙ্ক্ষা ও অবাধ ও নিরপেক্ষ নির্বাচনকে বাধাগ্রস্ত করবে। **তৃতীয়ত:** দলীয়করণের প্রভাবের কারণে দায়িত্ব পালনে প্রশাসন ও আইন-শৃঙ্খলা রক্ষাকারী বাহিনীর মধ্যে পক্ষপাতিত্ব দেখা দেবে। **চতুর্থত:** দায়িত্ব পালনে নৈতিক সাহসের অভাব ও নির্বাচনী অনিয়ম কঠোরভাবে দমন করতে না পারার ব্যর্থতায় কমিশনের বিরুদ্ধে পক্ষপাতদুষ্টতার অভিযোগ উঠতে পারে। **পঞ্চমত:** রাজনীতির সাথে যুক্ত না হয়েও যেসকল সমাজকর্মী অতীতে জনপ্রতিনিধি নির্বাচিত হয়ে জনসেবায় অবদান রাখতেন, দলভিত্তিক নির্বাচনের ফলে এই মানুষগুলো হারিয়ে যাবেন: সঙ্কুচিত হয়ে পড়বে তাঁদের অবদানও।

উল্লেখ্য, এক সময় এমন ধারণা প্রচলিত ছিল যে, জনসেবার সর্বোচ্চ পছন্দ হচ্ছে রাজনীতি। যারা ত্যাগের সংস্কৃতি লালন করেন এবং জনকল্যাণকে ব্রত হিসেবে গ্রহণ করেন, তাঁরাই রাজনীতিতে সম্পৃক্ত হন। বর্তমানে আমাদের দেশের রাজনীতিতে ব্যাপক নেতিবাচক গুণগত পরিবর্তন ঘটেছে। এখন ত্যাগের সংস্কৃতির পরিবর্তে রাজনীতিতে চালু হয়েছে ভোগের সংস্কৃতি। সং নেতা-কর্মীদের কোনাঙ্গা করে অসং নেতা-কর্মীদের দাপট এখন বড় বড় প্রতিটি দলেই দৃশ্যমান। আর এদের কর্মকাণ্ডই 'রাজনৈতিক দুর্বৃত্তায়ন' হিসেবে পরিচিতি পাচ্ছে।

এবারের ইউনিয়ন পরিষদ নির্বাচনে সংঘটিত ঘটনাবলীই প্রমাণ করে যে, আমাদের আশঙ্কাগুলো যৌক্তিক ছিল। পাশাপাশি দলভিত্তিক নির্বাচনের যে নগ্ন চেহারা উন্মোচিত হয়েছে, তা এর সপক্ষে প্রদত্ত ইতিবাচক যুক্তিগুলোর সাথে সামঞ্জস্যপূর্ণ নয়। তাই আমরা মনে করি, ব্যাপক সহিংসতা ও অনিয়মের মধ্য দিয়ে এবারে যে মন্দ নির্বাচনের দৃষ্টান্ত সৃষ্টি হলো, এর প্রধান কারণ দলভিত্তিক নির্বাচন। উল্লেখ্য, অতীতে রাজনৈতিক দলগুলো স্থানীয় সরকার নির্বাচনকে দলীয় অবয়ব দেওয়ার চেষ্টা করলেও একই দল থেকে একাধিক প্রার্থী অংশ নেওয়ায় নির্বাচনগুলো বিশেষ করে ইউনিয়ন পরিষদ নির্বাচন কখনই পুরোপুরি রাজনৈতিক পরিচিতি পায়নি।

১.২. মনোনয়ন বাণিজ্য: অতীতে নির্দলীয় নির্বাচন হওয়ায় প্রার্থী মনোনয়নের প্রয়োজন হয়নি। রাজনৈতিক দলগুলো থেকে তখন কোথাও কোথাও কোনো কোনো প্রার্থীকে সমর্থন দেওয়া হতো। একই দলের একাধিক প্রার্থী থাকলে তাও করা হতো না। দলভিত্তিক স্থানীয় সরকার নির্বাচন ব্যবস্থার কারণে এবারে নির্বাচনী আইনানুযায়ী দলগুলোকে প্রার্থীদের মনোনয়ন প্রদান করতে হয়েছে। এক্ষেত্রে দলগুলো সুনির্দিষ্ট নিয়ম-নীতির ভিত্তিতে গণতান্ত্রিক পদ্ধতিতে সবচেয়ে জনপ্রিয় প্রার্থীকে মনোনয়ন প্রদানের বিষয়টির ওপর গুরুত্বারোপ করেনি। বেশির ভাগ ক্ষেত্রেই এখানে গুরুত্ব পেয়েছে অর্থ ও পেশিশক্তি। প্রার্থীদের দিক থেকে গুরুত্ব পেয়েছে মনোনয়ন প্রদানের সাথে সংশ্লিষ্টদের সম্ভ্রষ্ট বিধানের বিষয়টি। ফলে দেদার বাণিজ্য হয়েছে এই নির্বাচনকে ঘিরে।

বড় বড় রাজনৈতিক দলগুলোর বিরুদ্ধেই মূলত মনোনয়ন বাণিজ্যের অভিযোগ উঠেছে। ক্ষমতাসীন দলের ক্ষেত্রে এই অভিযোগ ব্যাপক। এক্ষেত্রে স্থানীয় সংসদ সদস্য এবং জেলা ও উপজেলা আওয়ামী লীগের প্রভাবশালী নেতাদের বিরুদ্ধে বেশি করে উঠেছে এ অভিযোগ। দেখা গিয়েছে যে, কয়েক ধাপে হয়েছে মনোনয়ন বাণিজ্য। সর্বপ্রথম কাজটি ছিল ইউনিয়ন ও ওয়ার্ড পর্যায়ের নেতা-কর্মীদের মন যুগিয়ে নিজের সপক্ষে আওয়াজ তোলা। দ্বিতীয় কাজটি ছিল সংশ্লিষ্ট জেলা-উপজেলা নেতৃবৃন্দকে সম্ভ্রষ্ট করা। মাননীয় সংসদ সদস্যের সম্ভ্রষ্টবিধান মনোনয়ন প্রাপ্তির ক্ষেত্রে একটি গুরুত্বপূর্ণ ধাপ হিসেবে বিবেচিত হয়েছে। এ ক্ষেত্রে সর্বশেষ ধাপ ছিল কেন্দ্রীয় মনোনয়ন বোর্ড। অনেক ক্ষেত্রে এধাপটিতেও কাঠ-খড় পোড়াতে হয়েছে অনেককে। বিশেষ করে এই পর্যায়ে এসে যারা পূর্বের নাম পরিবর্তন করে নিজের নামটি চূড়ান্ত তালিকায় অন্তর্ভুক্ত করেছেন। মনোনয়ন বাণিজ্যের পাশাপাশি নির্বাচনে জয়ের পরিবেশ সৃষ্টিতে এবং ফলাফল পাল্টে দেয়ার জন্যও বিনিয়োগের অভিযোগ আছে কোথাও কোথাও।

মনোনয়ন বাণিজ্যের বিষয়টি এমন পর্যায়ে গিয়েছিল যে, দেশের বিভিন্ন অঞ্চলে এর বিরুদ্ধে প্রকাশ্য প্রতিবাদ-বিক্ষোভ করেছেন ক্ষমতাসীন দলের স্থানীয় নেতা-কর্মীরা। নিজ দলের ত্যাগী নেতা-কর্মীদের বাদ দিয়ে দলছুট ব্যক্তিদের এমনটি বিএনপি-জামাতপন্থীদের মনোনয়ন দেওয়ারও অভিযোগ উঠেছে আওয়ামী লীগের বিরুদ্ধে।

রাজনৈতিক দলগুলোর নেতৃবৃন্দ যদি মনোনয়ন বাণিজ্যের কথা না ভেবে সংশ্লিষ্ট সকলের মতামতের ভিত্তিতে নিয়মতান্ত্রিকভাবে প্রার্থীদের মনোনয়ন প্রদান করতেন তবে তা একদিকে যেমন দলের মধ্যে গণতান্ত্রিক চেতনা বিকাশের পথ সুগম করতো অপরদিকে তা দলে এবং স্থানীয় সরকার প্রতিষ্ঠানসমূহে ভালো মানুষের নেতৃত্বকে প্রতিষ্ঠা করতো। জনসেবার ক্ষেত্রে এর সুফল হতো সুদূর প্রসারী।

১.৩. নির্বাচনে সহিংসতা: বাংলাদেশে এ পর্যন্ত নয়বার ইউনিয়ন পরিষদ নির্বাচন অনুষ্ঠিত হলো। আমাদের দেশে নির্বাচন বিশেষ করে ইউনিয়ন পরিষদ নির্বাচনকে সামনে রেখে গ্রামে-গঞ্জে একদিকে যেমন ব্যাপক উৎসাহ উদ্দীপনার সৃষ্টি হয়, পাশাপাশি প্রার্থী ও সমর্থকদের বিরোধে সংঘাত-সংঘর্ষও হয়। ফলে হতাহতের ঘটনাও ঘটে থাকে। এবারের ইউনিয়ন পরিষদ নির্বাচনে ব্যাপক সহিংসতা অতীতের সকল রেকর্ড অতিক্রম করেছে।

১.৩.১. সহিংসতায় প্রাণহানি: ইউনিয়ন পরিষদ নির্বাচনে প্রাণহানির তথ্য অনুসন্ধান করে দেখা যায় যে, ১৯৭৩, ১৯৭৭, ১৯৮৩ ও ১৯৯২-এ প্রাণহানির কোনো ঘটনা ঘটেনি। ১৯৮৮ সালে ৮০ জন, ১৯৯৭ সালে ৩১ জন, ২০০৩ সালে ২৩ জন এবং ২০১১ সালে ১০ জনের প্রাণহানি ঘটেছে বলে জানা যায়। ইতোপূর্বে অধিক প্রাণহানির ঘটনা ঘটে ১৯৮৮ সালে। ঐ নির্বাচনটিকেই সবচেয়ে মন্দ ইউনিয়ন পরিষদ নির্বাচন বলে আখ্যায়িত করা হতো।

প্রাণহানির ক্ষেত্রে নতুন রেকর্ড সৃষ্টি হলো এবারের ইউনিয়ন পরিষদ নির্বাচনে। গণমাধ্যমে প্রকাশিত তথ্যের ভিত্তিতে প্রণীত তালিকা অনুযায়ী, এবার নির্বাচনী তফসিল ঘোষণার পর থেকে এ পর্যন্ত নির্বাচনপূর্ব, নির্বাচনকালীন ও নির্বাচন পরবর্তী সংঘর্ষ এবং নির্বাচনকেন্দ্রিক বিরোধের জেরে ১৪৬ জনের প্রাণহানি ঘটেছে। তথ্য পর্যালোচনা করে দেখা যায় যে, প্রথম ধাপের নির্বাচনের পূর্বে ১০ জন, প্রথম ধাপের নির্বাচনের দিন ১১ জন, প্রথম ধাপের নির্বাচনের পর থেকে দ্বিতীয় ধাপের নির্বাচনের পূর্ব পর্যন্ত ১১ জন, দ্বিতীয় ধাপের নির্বাচনের দিন ৯ জন, দ্বিতীয় ধাপের নির্বাচনের পর থেকে তৃতীয় ধাপের নির্বাচনের পূর্ব পর্যন্ত ১৭ জন, তৃতীয় ধাপের নির্বাচনের দিন ৫ জন, তৃতীয় ধাপের নির্বাচনের পর চতুর্থ ধাপের নির্বাচনের পূর্ব পর্যন্ত ১০ জন, চতুর্থ ধাপের নির্বাচনের দিন ৮ জন এবং চতুর্থ ধাপের নির্বাচনের পর থেকে এ পর্যন্ত ২৩ জন, পঞ্চম ধাপের নির্বাচনের দিন ১৫ জন, পঞ্চম ধাপের নির্বাচনের পর ৮ জন, ষষ্ঠ ধাপের নির্বাচনের দিন ৫ জন এবং ষষ্ঠ ধাপের নির্বাচনের পর ১৪ জন প্রাণ হারিয়েছে।

বিভাগভিত্তিক প্রাণহানির তথ্য বিশ্লেষণে দেখা যায় যে, চট্টগ্রাম বিভাগে ৩২ জন, ঢাকা বিভাগে ৩০ জন, রাজশাহী বিভাগে ২০, বরিশাল বিভাগে ১৭ জন, জন, খুলনা বিভাগে ১৭ জন, ময়মনসিংহ বিভাগে ১৬ জন, রংপুর বিভাগে ৯ জন এবং সিলেট বিভাগে ৫ জন প্রাণ হারিয়েছেন। জেলাভিত্তিক তথ্য বিশ্লেষণে দেখা যায় যে, ৬৪টি জেলার সবগুলোতেই সংঘর্ষের ঘটনা ঘটেছে। প্রাণহানি ঘটেছে ৪৬টিতে। সর্বোচ্চ ১১জন প্রাণ হারিয়েছে চট্টগ্রাম জেলায়। ৭জন করে প্রাণ হারিয়েছে পিরোজপুর, যশোর ও ময়মনসিংহ জেলায়; ৬জন প্রাণ হারিয়েছে কুমিল্লা জেলায়; ৫জন করে প্রাণ হারিয়েছে কক্সবাজার, বগুড়া, পাবনা, রাজশাহী, ও জামালপুর জেলায়; ৪জন করে প্রাণ হারিয়েছে ঢাকা, গাজীপুর, মাদারীপুর, নরসিংদী, নড়াইল, নোয়াখালী, পটুয়াখালী ও গাইবান্ধা জেলায়; ৩জন করে প্রাণ হারিয়েছে কিশোরগঞ্জ, ঝিনাইদহ, ভোলা, ঠাকুরগাঁও, নারায়ণগঞ্জ, হবিগঞ্জ ও নাটোর জেলায়; ২জন করে প্রাণ হারিয়েছে মুন্সীগঞ্জ, ফরিদপুর, মাগুরা, বান্দরবান, ব্রাহ্মণবাড়িয়া, কুষ্টিয়া, নেত্রকোণা ও শেরপুর জেলায় এবং ১জন করে প্রাণ হারিয়েছে মানিকগঞ্জ, ফেনী, চাঁদপুর, বরগুনা, বরিশাল, ঝালকাঠি, সিরাজগঞ্জ, রংপুর, পঞ্চগড়, সিলেট, সুনামগঞ্জ, বাগেরহাট, জয়পুরহাট ও টাঙ্গাইল জেলায়।

নিহতদের দলগত পরিচয়ের দিক থেকে দেখা যায় যে, বাংলাদেশ আওয়ামী লীগের নেতা, কর্মী বা সমর্থক ৫২ জন, বাংলাদেশ আওয়ামী লীগের বিদ্রোহী প্রার্থীর কর্মী বা সমর্থক ১৭ জন, বাংলাদেশ জাতীয়তাবাদী দলের ৩ জন, বাংলাদেশ জাতীয়তাবাদী দলের বিদ্রোহী ১ জন, জাতীয় পার্টি-জেপি'র ১ জন, জনসংহতি সমিতির ১ জন, স্বতন্ত্র প্রার্থীর কর্মী বা সমর্থক ৪ জন, মেম্বার প্রার্থীর কর্মী বা সমর্থক ৩৩ জন, পুলিশ কনস্টেবল ১ জন এবং গ্রামপুলিশ ১ জন রয়েছেন। ৩২ জনের ক্ষেত্রে কোনো দল বা প্রার্থীর সঙ্গে সংশ্লিষ্টতার তথ্য পাওয়া যায়নি। নিহতদের মধ্যে একজন নবনির্বাচিত চেয়ারম্যান, একজন চেয়ারম্যান প্রার্থী, একজন সম্ভাব্য চেয়ারম্যান প্রার্থী এবং ৪ জন মেম্বার প্রার্থীসহ ৬ জন নারী ও ৬ জন শিশুসহ রয়েছে। নিহত সর্বমোট ১৪৫ জনের মধ্যে চেয়ারম্যান পদের নির্বাচন সংশ্লিষ্ট ঘটনা বা বিরোধেই প্রাণ গিয়েছে ৮৯জনের। চেয়ারম্যান প্রার্থীদের মধ্যে অধিকাংশ সংঘর্ষের ঘটনা ঘটেছে আওয়ামী লীগ ও আওয়ামী লীগের বিদ্রোহী প্রার্থীর কর্মী বা সমর্থকদের মধ্যে। পক্ষান্তরে আওয়ামী লীগ ও বিএনপি'র মধ্যে প্রাণঘাতি সংঘর্ষের ঘটনা জানা গিয়েছে মাত্র ৩টি। এর কারণ হিসেবে বলা যায়, অধিকাংশ ইউনিয়নে বিএনপি'র সরব উপস্থিতি লক্ষ্য করা যায়নি। পাশাপাশি যেসকল স্থানে বিএনপি ছিল, সেখানে তারা সংঘর্ষের ন্যূনতম সম্ভাবনা বা ঝুঁকি এড়িয়ে চলেছে।

এ পর্যন্ত নিহত ১৪৬ জনের মধ্যে নির্বাচন-পূর্ব সংঘর্ষে ৫৬ জন, নির্বাচনকালীন সংঘর্ষে ৫৭ জন এবং নির্বাচনান্তর সংঘর্ষে ৩৩ জনের মৃত্যু হয়েছে। আমরা মনে করি যে, প্রতিযোগিতার মনোভাব থেকে গ্রহণ না করে, যে কোনো মূল্যেই জয়ী হওয়ার আকাঙ্ক্ষাই নির্বাচনী সহিংসতার বড় কারণ।

১.৩.২. সহিংসতায় আহত: নির্বাচনী সহিংসতায় প্রাণহানির পাশাপাশি ব্যাপক সংখ্যক মানুষ আহতও হয়েছেন। গণমাধ্যমে প্রকাশিত তথ্য অনুযায়ী, নির্বাচনী তফসিল ঘোষণার পর থেকে এ পর্যন্ত সাড়ে এগারো হাজারেরও অধিক মানুষ আহত হয়েছে। তথ্য পর্যালোচনা করে দেখা যায় যে, তফসিল ঘোষণার পর থেকে প্রথম ধাপের নির্বাচনের দিন পর্যন্ত দুই হাজার ছয়শত জনের অধিক (২,৬৬০), প্রথম ধাপের পর থেকে দ্বিতীয় ধাপের নির্বাচনের দিন পর্যন্ত এক হাজার ছয়শত জনের অধিক (১,৬০৮), দ্বিতীয় ধাপের পর থেকে তৃতীয় ধাপের নির্বাচনের দিন পর্যন্ত দুই হাজার আটশত জনের অধিক (২,৮৮২), তৃতীয় ধাপের পর থেকে চতুর্থ ধাপের নির্বাচনের দিন পর্যন্ত এক হাজার দুইশত জনের অধিক (১,২৮৫), চতুর্থ ধাপের পর থেকে পঞ্চম ধাপের নির্বাচনের দিন পর্যন্ত এক হাজার আটশত জনের অধিক (১,৮৩৬), পঞ্চম ধাপের পর থেকে ষষ্ঠ ধাপের নির্বাচনের দিন পর্যন্ত এক হাজার জনের অধিক (১,০১৬) এবং ষষ্ঠ ধাপের পর থেকে অদ্যাবধি তিন শতাধিক (৩১৫) ব্যক্তি আহত হয়েছেন। উল্লেখ্য, প্রতিটি জেলারই কোথাও না কোথাও নির্বাচনী সহিংসতার ঘটনা ঘটেছে (তথ্যসূত্র: যুগান্তর)।

১.৪. বিনা প্রতিদ্বন্দ্বিতায় নির্বাচিত হওয়া: অতীতে কোনো নির্বাচনে বিনাপ্রতিদ্বন্দ্বিতায় নির্বাচিত হওয়ার বিষয়টিকে আমরা দেখেছি ব্যতিক্রমী ঘটনা হিসেবে। নির্বাচনী আইনানুযায়ী এটা দোষের না। চেয়ারম্যান পদে বিনা প্রতিদ্বন্দ্বিতায় নির্বাচিত হওয়ার অতীতের যে তথ্য পাওয়া যায়, সে হিসেবে চেয়ারম্যান পদে ১৯৮৮ সালে ১০০ জন, ১৯৯২ সালে ৪ জন, ১৯৯৭ সালে ৩৭ জন এবং ২০০৩ সালে ৩৪ জন বিনা প্রতিদ্বন্দ্বিতায় নির্বাচিত হয়েছিলেন। ২০১১ সালের ইউনিয়ন পরিষদ নির্বাচনের এ সংক্রান্ত কোনো তথ্য পাওয়া যায়নি। এক্ষেত্রেও ১৯৮৮ সালে ১০০ জন বিনা প্রতিদ্বন্দ্বিতায় নির্বাচিত হওয়ার সংখ্যাটি ছিল সর্বোচ্চ।

তবে অতীতের সকল রেকর্ড স্মান হয়ে গিয়েছে এবারের নির্বাচনে বিনা প্রতিদ্বন্দ্বিতায় নির্বাচিতদের সংখ্যার কাছে। নবম ইউনিয়ন পরিষদ নির্বাচনে এই সংখ্যা ২১৪। প্রথম ধাপে ৫৪ জন, দ্বিতীয় ধাপে ৩৪ জন, তৃতীয় ধাপে ২৯ জন, চতুর্থ ধাপে ৩৫ জন, পঞ্চম ধাপে ৩৯ জন এবং ষষ্ঠ ধাপে ২৪ জন চেয়ারম্যান প্রার্থী বিনা প্রতিদ্বন্দ্বিতায় নির্বাচিত হয়েছেন। এদের মধ্যে মাত্র ২ জন স্বতন্ত্র এবং অবশিষ্ট ১১২ জনই ক্ষমতাসীন বাংলাদেশ আওয়ামী লীগ থেকে নির্বাচিত।

ব্যাপকহারে বিনা প্রতিদ্বন্দ্বিতায় নির্বাচিত হওয়ার কারণ অনুসন্ধান করে জানা যায় যে, অনেক স্থানে ভয়-ভীতি প্রদর্শন, মনোনয়নপত্র জমাদানে বাধা প্রদান, মনোনয়নপত্র কেড়ে নেওয়া বা ছিঁড়ে ফেলার কারণে বিএনপি ও আওয়ামী লীগের বিদ্রোহী প্রার্থীরা

মনোনয়নপত্র জমা দিতে পারেননি। কেউ কেউ মনোনয়নপত্র দাখিল করলেও ভয়-ভীতি প্রদর্শন ও চাপ সৃষ্টির কারণে প্রত্যাহার করতে বাধ্য হয়েছেন। ছোট-খাটো বা সংশোধনযোগ্য ত্রুটির কারণে যাচাই-বাছাই কালে বাতিল হয়ে গেছে অনেকের মনোনয়নপত্র।

অনুসন্ধানের বিনাপ্রতিদ্বন্দ্বিতায় নির্বাচিত হওয়ার আর একটি বড় কারণ হিসেবে চিহ্নিত করা যায়, অনেক ইউনিয়নে বিএনপি কর্তৃক প্রার্থী না দিতে পারাকে। অনেক অঞ্চলে মামলা ও গ্রেপ্তারে ভয়ে সম্ভাব্য প্রার্থীরা পালিয়ে গিয়েছেন। কোনো কোনো এলাকায় নিজের ও পরিবার পরিজনদের নিরাপত্তা বিঘ্নিত হওয়ার আশঙ্কায় অনেকে দলের কাছে মনোনয়নই চাননি। কোথাও কোথাও বিএনপি নেতৃবৃন্দ স্বতন্ত্র প্রার্থী হিসেবে নির্বাচনে অংশ নিয়েছেন। ফলে দেখা গিয়েছে যে, এই নির্বাচনে চেয়ারম্যান পদে বাংলাদেশ জাতীয়তাবাদী দলের প্রার্থীশূন্য ছিল মোট ৫৫৪টি ইউনিয়ন। প্রথম ধাপে ১১৯, দ্বিতীয় ধাপে ৭৯, তৃতীয় ধাপে ৮১, চতুর্থ ধাপে ১০৬টি, পঞ্চম ধাপে ১০০টি এবং ষষ্ঠ ধাপে এখন পর্যন্ত ৬৯টি ইউনিয়নে বিএনপি'র প্রার্থীশূন্য ছিল। বিএনপির মত একটি বড় রাজনৈতিক ৫৫৪টি ইউনিয়নে প্রার্থী না থাকা একটি বড় ঘটনা বটে!

আমরা মনে করি, বিনা প্রতিদ্বন্দ্বিতায় নির্বাচিত হওয়ার হার যেভাবে বাড়ছে তা নিঃসন্দেহে উদ্বেগজনক। সম্পদশালী ও পেশীশক্তির অধিকারী প্রভাবশালী প্রার্থী বা দলের কাছে নির্বাচনে প্রতিদ্বন্দ্বিতার ঝুঁকিপূর্ণ প্রতিযোগিতা এড়ানোর জন্য এটা একটি জনপ্রিয় কৌশল হিসেবে বিবেচিত হতে পারে। এতে করে নির্বাচনী ব্যবস্থা আরও অকার্যকর হয়ে পড়তে পারে – যা জাতির জন্য হবে আত্মঘাতী।

১.৫. ধর্মীয় সংখ্যালঘুদের ওপর হামলা: দুর্ভাগ্যজনক হলেও সত্য যে, এবারের ইউনিয়ন পরিষদ নির্বাচনে দেশের কোনো কোনো অঞ্চলে, বিশেষ করে বরিশাল, পটুয়াখালী, বরগুনা, পিরোজপুর, খুলনা ও বাগেরহাট জেলায় নির্বাচনপূর্ব ও নির্বাচন পরবর্তীকালে সংখ্যালঘু হিন্দু সম্প্রদায় হামলার শিকার হয়েছে। বাগেরহাটের চিতলমারী ও ফকিরহাট এবং বরিশালের বানারীপাড়া, গৌরনদী, আটগেলঝাড়া ও উজিরপুরের বিভিন্ন স্থানে সংখ্যালঘু হিন্দু সম্প্রদায়ের উপর হামলার পাশাপাশি বাড়িঘর ভাঙচুর, অগ্নিসংযোগ ও লুটপাটের ঘটনা ঘটেছে। এক্ষেত্রে প্রায় প্রতিটি ঘটনা ক্ষমতাসীন বাংলাদেশ আওয়ামী লীগ অথবা আওয়ামী লীগের বিদ্রোহী প্রার্থীদের কর্মী-সমর্থকদের মাধ্যমে ঘটেছে বলে অভিযোগ উঠেছে। কোনো কোনো এলাকায় নির্বাচনের পূর্বে সংখ্যালঘুদের ভয়ভীতি প্রদর্শনের অভিযোগও পাওয়া গিয়েছে।

সুজন ছাড়াও সংখ্যালঘু সম্প্রদায়ের ওপর হামলাসহ নির্বাচনকেন্দ্রিক সহিংসতা রোধে কার্যকর ব্যবস্থা গ্রহণে নির্বাচন কমিশনের প্রতি আহ্বান জানানো হয়েছে একান্তরূপে ঘাতক দালাল নির্মূল কমিটির পক্ষ থেকে। বাংলাদেশ আওয়ামী লীগের উপদেষ্টা মঞ্জুরী সদস্য, সাবেক মন্ত্রী সুরঞ্জিত সেনগুপ্তকেও এ ব্যাপারে নির্বাচন কমিশনের বিরুদ্ধে ক্ষুব্ধ প্রতিক্রিয়া ব্যক্ত করতে দেখা গিয়েছে।

১.৬. নির্বাচন পরিচালনার সাথে সংশ্লিষ্টদের ভূমিকা: নির্বাচন পরিচালনার মূল দায়িত্ব নির্বাচন কমিশনের হাতে থাকলেও নির্বাচন পরিচালনার সাথে সংশ্লিষ্ট সকলেই যদি স্ব স্ব অবস্থানে থেকে নিজ নিজ দায়িত্ব সঠিকভাবে পালন করে না করে, তবে কখনই অবাধ, নিরপেক্ষ ও অর্থবহ নির্বাচন নিশ্চিত করা সম্ভব নয়। এবারের ইউনিয়ন পরিষদ নির্বাচনে নির্বাচন পরিচালনার সাথে সংশ্লিষ্টদের বিশেষ করে নির্বাচন কমিশন, সরকার ও রাজনৈতিক দলসমূহকে তাদের ভূমিকা যথাযথ ভাবে পালন করতে দেখা যায়নি।

১.৬.১. নির্বাচন কমিশনের ভূমিকা: একটি নির্বাচনের সঙ্গে অনেকগুলো প্রতিষ্ঠান জড়িত থাকলেও নির্বাচন পরিচালনার মূল দায়িত্ব নির্বাচন কমিশনের। নির্বাচন কমিশনের আইনী, নৈতিকতাপূর্ণ, নিরপেক্ষ ও সাহসী ভূমিকাই পারে নির্বাচনকে অবাধ, নিরপেক্ষ, শান্তিপূর্ণ ও অর্থবহ করার ক্ষেত্রে সবচেয়ে বড় ভূমিকা রাখতে। এবারের নির্বাচনে নির্বাচন কমিশনকে কখনই সক্ষমতা ও নিরপেক্ষতার সাথে দায়িত্ব পালন করতে দেখা যায়নি। বরং প্রথম থেকেই নির্বাচন কমিশনকে দুর্বল অবস্থানে দেখা গিয়েছে। প্রথম ধাপের মনোনয়ন পত্র দাখিলের সাথে সাথেই যখন গণমাধ্যমে ব্যাপক সংখ্যক ইউনিয়নে একটি করে মনোনয়ন পত্র জমা পড়া, মনোনয়ন পত্র জমাদানে বাধা দেওয়া, কেড়ে নেওয়া, ছিঁড়ে ফেলা, ভয়ভীতি প্রদর্শন, হামলা করা ইত্যাদি তথ্য সম্বলিত প্রতিবেদন গণমাধ্যমে প্রকাশিত ও প্রচারিত হয়েছে এবং কোনো কোনো অঞ্চলের নির্বাচন স্থগিত করার দাবি উঠেছে; তখন কমিশনের পক্ষ থেকে ঘোষণা দেওয়া হয়েছে যে, অভিযোগ না পেলে তারা কোনো অনিয়মের বিষয়কে আমলে নেবে না। অভিযোগ করা হলে বলা হয়েছে, অভিযোগ সুনির্দিষ্ট নয়। এমনকি সুস্পষ্টভাবে অভিযোগ করলেও তারা ব্যবস্থা গ্রহণ না করে পদক্ষেপ গ্রহণের দায় চাপিয়েছে কখনও রিটার্নিং অফিসার বা কখনও স্থানীয় পুলিশ প্রশাসনের উপর। আমরা জানি যে, বাংলাদেশের বিরাজমান রাজনৈতিক বাস্তবতায় স্থানীয় প্রশাসনের পক্ষে স্থানীয় প্রভাবশালী কারো বিরুদ্ধে ব্যবস্থা গ্রহণ এক রকম দুঃসাধ্যই বলা যায়। কমিশনের জন্য যা ছিল অপেক্ষাকৃত সহজ।

প্রথম ধাপের নির্বাচনের আগের দিন গণমাধ্যমের কাছে প্রধান নির্বাচন কমিশনার কাজী রকিবউদ্দীন আহমদ বলেছেন “আমরা নির্বাচনের জন্য রাষ্ট্রের অন্য বিভাগের ওপর নির্ভরশীল। যে কারণে তাদের উপর আমাদের কর্তৃত্ব কম। কাঙ্ক্ষিত সহযোগিতা পাই না। সেজন্য মারপিট হানাহানি অব্যাহত আছে। নির্বাচন অর্থকেন্দ্রিক হয়ে গেছে।” যে সময় নির্বাচন পরিচালনার সাথে সংশ্লিষ্টদের নির্বাচন কমিশন থেকে একটি কঠোর বার্তা যাওয়া উচিত ছিল, সেই সময় একটি ভুল বার্তা দিয়ে নিজেদের দুর্বলতা ও অসহায়ত্ব

প্রকাশ করেছে। তার এই বক্তব্য ভোটারদের মধ্যে আস্থা সৃষ্টির পরিবর্তে শঙ্কা বাড়িয়ে দিয়েছে। আমরা মনে করি, নির্বাচন কমিশনের দুর্বলতার কারণেই এই নির্বাচনে ব্যাপক অনিয়ম হয়েছে।

নির্বাচন কমিশনের বিরুদ্ধে নিরপেক্ষতা ভঙ্গেরও অভিযোগ উঠেছে। তৃতীয় ধাপের নির্বাচনের জন্য মনোনয়নপত্র দাখিলের কাজ সম্পন্ন হওয়ার পর যখন দেখা যায় যে, সন্ত্রাসীদের ভয়ে ১৯টি ইউনিয়নে বাংলাদেশ আওয়ামী লীগের এবং ২৭টি ইউনিয়নে বাংলাদেশ জাতীয়তাবাদী দলের প্রার্থীরা মনোনয়নপত্র দাখিল করতে পারেননি, তখন রাঙ্গামাটি জেলার সকল ইউনিয়নের নির্বাচন স্থগিত ঘোষণা করা হয়। অনেকেই বলছেন, বাংলাদেশ আওয়ামী লীগের প্রার্থীরা মনোনয়নপত্র দাখিল করতে পারেননি বলেই নির্বাচন কমিশন এই সিদ্ধান্ত নিয়েছে। কেননা প্রথম ও দ্বিতীয় ধাপের নির্বাচনে ব্যাপক সংখ্যক ইউনিয়নে (প্রথম ধাপে ১১৯ ও দ্বিতীয় ধাপে ৭৯টি) বাংলাদেশ জাতীয়তাবাদী দলের প্রার্থীরা মনোনয়নপত্র দাখিল করতে না পারলেও এবং সংশ্লিষ্ট ইউনিয়নসমূহের নির্বাচন স্থগিতের দাবি উঠলেও নির্বাচন কমিশন তখন নির্বাচন স্থগিত করেনি। তখন কমিশনের পক্ষ থেকে বলা হয়েছিল ‘কে দাঁড়ালো না দাঁড়ালো তা দেখার দায়িত্ব কমিশনের নয়’। উল্লেখ্য, প্রথম ধাপের নির্বাচনে বিনা প্রতিদ্বন্দ্বিতায় নির্বাচিত ৫৪ জন আওয়ামী লীগ প্রার্থীর মধ্যে ৩৪ জনই ছিলেন বাগেরহাট জেলার।

নির্বাচনকে সামনে রেখে ভোটারদের আকাজক্ষা ছিল একটি অবাধ, নিরপেক্ষ, শান্তিপূর্ণ ও অর্থবহ নির্বাচন আয়োজনের ক্ষেত্রে নির্বাচন কমিশন যথাযথ ভূমিকা পালন করুক। নির্বাচনে প্রতিদ্বন্দ্বিতাকারী প্রার্থীসহ নির্বাচনের সঙ্গে সংশ্লিষ্ট সকলেই যাতে নির্বাচনী আচরণবিধি যথাযথভাবে মেনে চলেন, সে ব্যাপারে নির্বাচন পরিচালনাকারী প্রতিষ্ঠান হিসেবে নির্বাচন কমিশন নিরপেক্ষতা ও সাহসিকতার সাথে কঠোর ভূমিকা পালন করুক। সকল দল ও প্রার্থীর জন্য ‘লেভেল প্লেয়িং ফিল্ড’ নিশ্চিত করুক। কালোটাকা ও পেশিশক্তির প্রভাবমুক্ত নির্বাচন অনুষ্ঠানে প্রয়োজনীয় সকল পদক্ষেপ গ্রহণ করুক। আইন-শৃঙ্খলা রক্ষাকারী বাহিনীসহ নির্বাচনী দায়িত্বে নিয়োজিত কর্মকর্তা-কর্মচারীদের নিরপেক্ষতা নিশ্চিত করুক। কেউ নিরপেক্ষতা ভঙ্গ করলে তাৎক্ষণিকভাবে তার বিরুদ্ধে শাস্তিমূলক ব্যবস্থা গ্রহণ করুক। অতীত অভিজ্ঞতার আলোকে ভোটদানের শান্তিপূর্ণ পরিবেশ নিশ্চিত করাসহ কেন্দ্র দখল, ব্যালট পেপার বা ব্যালট বাস্ক ছিনতাই রোধে পূর্ব থেকে সতর্কতামূলক ব্যবস্থা গ্রহণ করুক। কিন্তু নির্বাচন কমিশনের আচরণে সে আকাজক্ষার প্রতিফলন ঘটেনি।

১.৬.২. সরকারের ভূমিকা: একটি নির্বাচনকে অবাধ, নিরপেক্ষ, শান্তিপূর্ণ ও অর্থবহ করার ক্ষেত্রে সরকারের রয়েছে গুরুত্বপূর্ণ ভূমিকা। সরকারের প্রত্যক্ষ ও পরোক্ষ সহযোগিতা ছাড়া নির্বাচন কমিশনের একার পক্ষে সুষ্ঠু নির্বাচন নিশ্চিত করা সম্ভব নয়। এই নির্বাচনে আমরা প্রায়শই সরকারের সঙ্গে সংশ্লিষ্টদের মধ্যে নির্বাচনী নিয়ম-কানুন মেনে না চলার প্রবণতা লক্ষ্য করেছি। প্রথম থেকেই বিভিন্ন অঞ্চলে নির্বাচনের সাথে সংশ্লিষ্ট কোনো কোনো সরকারি কর্মকর্তা-কর্মচারিকে নিরপেক্ষতা ভঙ্গ করতে দেখা গিয়েছে। কোথাও কোথাও কেন্দ্র দখল ও জাল ভোট প্রদানে তাদের সহযোগিতা করতে, এমন কি নিজেদেরকে জাল ভোট দিতেও দেখা গিয়েছে। পুলিশ প্রশাসনের বিরুদ্ধেও নিক্রিয়তা ও জাল ভোট প্রদানে সহযোগিতার অভিযোগ পাওয়া গিয়েছে। অনেক ক্ষেত্রে এসব অনিয়ম ঘটেছে প্রকাশ্যভাবে। প্রথম দিকে সরকারের কোনো কোনো মন্ত্রীর বিরুদ্ধেও আচরণবিধি ভঙ্গের অভিযোগ উঠেছে। উল্লেখ্য, কৃতকর্মের জন্য পুলিশ বিভাগের কোনো কোনো কর্মকর্তার বিরুদ্ধে ব্যবস্থা গ্রহণের ব্যাপারে নির্বাচন কমিশনের উদ্যোগ পরিলক্ষিত হলেও, কোথাও কোথাও সরকারের অসহযোগিতার মনোভাব প্রকাশ পেয়েছে। একথা বলা অত্যাুক্তি হবে না যে, নির্বাচনের শুরু থেকেই আইনশৃঙ্খলা রক্ষাকারী বাহিনীসহ নির্বাচন সংশ্লিষ্টদের অপতৎপরতা রোধে সরকারের দিক থেকে কোনো কার্যকর উদ্যোগ পরিলক্ষিত হয়নি।

নির্বাচনকে সামনে রেখে ভোটারদের আকাজক্ষা ছিল, নির্বাচনকে অবাধ, নিরপেক্ষ ও শান্তিপূর্ণভাবে অনুষ্ঠানে সরকারের পক্ষ থেকে নির্বাচন কমিশনকে যেন সার্বিক সহযোগিতা প্রদান করা হয় এবং নিরপেক্ষতা বজায় রাখা হয়। সরকারের মন্ত্রীগণসহ গুরুত্বপূর্ণ ব্যক্তির যেন নির্বাচনী আচরণবিধি যথাযথভাবে মেনে চলেন, নির্বাচনী প্রচারণা থেকে বিরত থাকেন এবং প্রত্যক্ষ বা পরোক্ষভাবে নির্বাচনকে প্রভাবিত না করেন, সে ব্যাপারে তাদেরকে যেন সুস্পষ্ট নির্দেশনা প্রদান করা হয়। পাশাপাশি যেন এই মর্মে হুশিয়ারি উচ্চারণ করা হয় যে, আইন-শৃঙ্খলা রক্ষাকারী বাহিনীসহ নির্বাচনী দায়িত্বে নিয়োজিত কর্মকর্তা ও কর্মচারীরা নিরপেক্ষতা ভঙ্গ করলে এবং নির্বাচনী দায়িত্ব যথাযথভাবে পালন না করলে তাঁর বিরুদ্ধে কঠোর শাস্তিমূলক ব্যবস্থা গ্রহণ করা হবে। কিন্তু সরকারের দিক থেকে এ ধরনের কোনো উদ্যোগ পরিলক্ষিত হয়নি।

৬.৩. রাজনৈতিক দলের ভূমিকা: রাজনৈতিক দলসমূহও বিশেষ করে ক্ষমতাসীন দল এই নির্বাচনে ইতিবাচক ভূমিকা পালন করেনি। তাদের বিরুদ্ধে নির্বাচনী আচরণবিধি ভঙ্গসহ বিভিন্ন ধরনের নির্বাচনী অনিয়ম ছাড়াও মনোনয়ন বাণিজ্যের অভিযোগ উঠেছে ব্যাপকভাবে। দলের প্রার্থী, কর্মী, সমর্থক এমনকি সংসদ সদস্যগণ আচরণবিধি ভঙ্গসহ বেপরোয়া আচরণ করলেও, তা প্রতিরোধে দলের হাইকমান্ডকে কোনো উদ্যোগ গ্রহণ করতে দেখা যায়নি।

নির্বাচনকে সামনে রেখে ভোটারদের আকাঙ্ক্ষা ছিল, রাজনৈতিক দলগুলো যেন নির্বাচনী আচরণবিধিসহ নির্বাচনী আইন-কানুন যথাযথভাবে মেনে চলে। তারা যেন মনোনয়ন বাণিজ্যের মনোভাব পরিহার করে, সুনির্দিষ্ট নিয়ম-নীতির ভিত্তিতে গণতান্ত্রিক পদ্ধতিতে সং, যোগ্য ও জনকল্যাণে নিবেদিত ব্যক্তিদের মনোনয়ন দেন। দলীয় সংসদ সদস্যগণ নির্বাচনী আচরণবিধি ভঙ্গ করলে তার বিরুদ্ধে যেন কঠোর শাস্তিমূলক ব্যবস্থা গ্রহণ করা হয়। ‘যে কোনো মূল্যেই জয়ী হওয়া’র দৃষ্টিভঙ্গি পরিহার করে তারা যেন নির্বাচনকে প্রতিযোগিতার মনোভাব থেকে গ্রহণ করে। কিন্তু ভোটারদের সেই আকাঙ্ক্ষা পূরণ হয়নি।

১.৭. নির্বাচন সম্পর্কে প্রতিক্রিয়া: প্রতিটি ধাপের নির্বাচনের পর অনুষ্ঠিত নির্বাচন সম্পর্কে প্রতিক্রিয়ায় নির্বাচন কমিশনের পক্ষ থেকে “বিচ্ছিন্ন কিছু ঘটনা ছাড়া সার্বিকভাবে এ নির্বাচন সুষ্ঠু ও গ্রহণযোগ্য হয়েছে। ভোটারদের উপস্থিতি ছিল স্বতঃস্ফূর্ত, অল্প কিছু জায়গায় অনিয়ম হয়েছে।” এই ধরনের প্রতিক্রিয়া ব্যক্ত করা হয়েছে। কখনও কখনও সহিংসতার বিষয়টি কমিশন স্বীকার করে দুঃখ প্রকাশ করেছে। বাংলাদেশ আওয়ামী লীগের পক্ষ থেকেও নির্বাচন কমিশনের অনুরূপ প্রতিক্রিয়া ব্যক্ত করা হয়েছে। তবে এক পর্যায়ে এসে অবাধ, সুষ্ঠু ও শান্তিপূর্ণভাবে সম্পন্ন করার জন্য কঠোরভাবে আইন আইন প্রয়োগের জন্য দলটির পক্ষ থেকে নির্বাচন কমিশনের প্রতি আহ্বান জানানো হয়। আহ্বান জানানো হয়, সহিংসতা বন্ধ করার জন্যও। বাংলাদেশ জাতীয়তাবাদী দলের পক্ষ থেকে বিভিন্ন ধাপে নির্বাচনে সন্ত্রাস, কেন্দ্র দখল, ভোট জালিয়াতি, দলীয় এজেন্টদের কেন্দ্র থেকে বের করে দেওয়া, প্রার্থীদের উপর হামলা ও ভয়-ভীতি প্রদর্শন ইত্যাদির চিত্র তুলে ধরে প্রতিক্রিয়া ব্যক্ত করা হয়। কখনও কখনও ‘ভোট ডাকাতি’র নির্বাচন আখ্যা দিয়ে তা বাতিল ও নির্বাচন কমিশনের পদত্যাগ দাবিও করা হয়। এক পর্যায়ে অনিয়মের অভিযোগে পরবর্তী ধাপগুলোর নির্বাচনে বিএনপি বা তার নেতৃত্বাধীন জোটের পক্ষ থেকে অংশ না নেওয়ার মনোভাব ব্যক্ত করা হলেও পরবর্তীতে সবগুলো ধাপের নির্বাচনে অংশ নিয়েছে দলটি। জাতীয় পার্টির পক্ষ থেকে বিভিন্ন সময় কেন্দ্র দখল, দলীয় এজেন্টদের বের করে দিয়ে জাল ভোট দেওয়া, প্রার্থীদের উপর হামলা ও ভয়-ভীতি প্রদর্শনের অভিযোগ করা হয়েছে। এসবের জন্য তারা নির্বাচন কমিশনকে দায়ী করেন। বাংলাদেশের ওয়ার্কাস পার্টির পক্ষ থেকেও বিভিন্ন সময় বিভিন্ন ইউনিয়নে নৌকা প্রতীকের প্রার্থীর পক্ষে কেন্দ্র দখল, প্রতিদ্বন্দ্বী এজেন্টদের বের করে সিল মারার উৎসব করার অভিযোগ আনা হয়েছে। পুলিশ ও স্থানীয় প্রশাসন কেন্দ্র দখলদার ও সন্ত্রাসীদের পক্ষে ভূমিকা পালনেরও অভিযোগ আনা হয়েছে। পর্যবেক্ষক সংস্থা ব্রতী ও মানবাধিকার সংগঠন আইন ও সালিশ কেন্দ্র (আসক)সহ বিশিষ্ট নাগরিকদেরকেও বিভিন্ন অনিয়ম ও সহিংসতার বিষয়গুলো তুলে ধরে উদ্বেগ প্রকাশ করতে এবং সুষ্ঠু ও শান্তিপূর্ণ নির্বাচন নিশ্চিত করতে করণীয় সম্পর্কে পরামর্শ প্রদান করতে দেখা গিয়েছে।

সংশ্লিষ্ট সকলের প্রতিক্রিয়ার দিকটি বিশ্লেষণ করে দেখা গিয়েছে যে, নির্বাচন কমিশন ও বাংলাদেশ আওয়ামী লীগের প্রতিক্রিয়ার ধরন কিছুটা এক রকম – যা ইতিবাচক। অন্যান্যদের প্রতিক্রিয়ার ধরনটা ছিল প্রায় বিপরীতমুখী – যা সমালোচনা ও পরামর্শমূলক।

১.৮. নির্বাচনের ফলাফল: ব্যাপক সহিংসতা ও অনিয়মসহ বিভিন্ন কারণে এবারের ইউনিয়ন পরিষদ নির্বাচন প্রতিযোগিতামূলক হয়নি। তাই, ফলাফল হয়েছে একপেশে। গণমাধ্যমে প্রকাশিত নির্বাচন কমিশন সূত্রের তথ্য অনুযায়ী মোট ৬ ধাপে নির্বাচন হয়েছে ৪১০৪ টি। ফলাফল ঘোষিত হয়েছে ৪০০০টি ইউনিয়নের। স্থগিত আছে ১০৪টি ইউনিয়নের ফলাফল। ফলাফল পর্যালোচনা করে দেখা যায় যে, বাংলাদেশ আওয়ামী লীগ ২৬৬৭টি (৬৬.৬৭%), বাংলাদেশ জাতীয়তাবাদী দল ৩৬৭টি (৯.১৭%), জাতীয় পার্টি-জাপা ৫৭টি (১.৪২%), জাতীয় সমাজতান্ত্রিক দল-জাসদ ৮টি (০.২০%), জাতীয় পার্টি-জেপি ৫টি (০.১২%), বাংলাদেশের ওয়ার্কাস পার্টি ৩টি (০.১২%), ইসলামী আন্দোলন বাংলাদেশ ৩টি (০.০৭%), জমিয়তে উলামায়ে ইসলাম বাংলাদেশ ১টি (০.০২%), জাকের পার্টি ১টি (০.০২%) এবং স্বতন্ত্র প্রার্থীরা ৮৮৮টি (২২.২%) ইউনিয়নে জয়ী হয়েছে। আমাদের হাতে আসা ফলাফল নিম্নের ছকেও প্রদত্ত হলো (তথ্যসূত্র: প্রথম আলো, ১৪ এপ্রিল ২০১৬)।

রাজনৈতিক দল	নির্বাচন হওয়া ইউপি’র সংখ্যা	ফলাফল ঘোষণা	স্থগিত	বিজয়ী (ইউনিয়ন)		মন্তব্য
				সংখ্যা	শতকরা	
বাংলাদেশ আওয়ামী লীগ	৪১০৪	৪০০০	১০৪	২৬৭৭	৬৬.৬৭	২১৪ জন বিনা প্রতিদ্বন্দ্বিতায় নির্বাচিত হয়েছেন
বাংলাদেশ জাতীয়তাবাদী দল-বিএনপি				৩৬৭	৯.১৭	
জাতীয় পার্টি-জাপা				৫৭	১.৪২	
জাতীয় সমাজতান্ত্রিক দল-জাসদ				৮	০.২০	
জাতীয় পার্টি-জেপি				৫	০.১২	
বাংলাদেশের ওয়ার্কাস পার্টি				৩	০.০৭	
ইসলামী আন্দোলন বাংলাদেশ				৩	০.০৭	
জমিয়তে উলামায়ে ইসলাম বাংলাদেশ				১	০.০২	

জাকের পার্টি				১	০.০২	
স্বতন্ত্র				৮৮৮	২২.২	
সর্বমোট	৪১০৪	৪০০০	১০৪	৪০০০	১০০	

ফলাফল বিশ্লেষণে দেখা যায় যে, চেয়ারম্যান পদে শতকরা ৬৬.৬৭% ইউনিয়নেই জয় পেয়েছে বাংলাদেশ আওয়ামী লীগের প্রার্থীরা। বাংলাদেশের রাজনৈতিক বাস্তবতায় আওয়ামী লীগের সঙ্গে বাংলাদেশ জাতীয়তাবাদী দলের প্রতিদ্বন্দ্বিতা হওয়ার কথা থাকলেও দলটি প্রতিদ্বন্দ্বিতার ধারে কাছেও ছিল না। বরং আওয়ামী লীগের সঙ্গে কিছুটা প্রতিদ্বন্দ্বিতা হয়েছে স্বতন্ত্র প্রার্থীদের। আর স্বতন্ত্র প্রার্থী হিসেবে বিজয়ী চেয়ারম্যানদের সিংহভাগই ছিলেন আওয়ামী লীগের বিদ্রোহী প্রার্থী। সেই দিক থেকে বিচার করলে বলা যায় যে, এই নির্বাচনের মধ্য দিয়ে শতকরা ৮৫-৮৬% ইউনিয়ন কোনো না কোনো ভাবে গিয়েছে আওয়ামী লীগের দখলে।

ক্ষমতাসীন বাংলাদেশ আওয়ামী লীগ বিপুল বিজয় পেলেও এই নির্বাচনে দলটির কিছু দুর্বলতাও প্রকাশ পেয়েছে। প্রথমত, প্রার্থী মনোনয়নের ক্ষেত্রে দলটি যথাযথভাবে গণতান্ত্রিক প্রক্রিয়া অনুসরণে ব্যর্থ হয়েছে। দ্বিতীয়ত, দলীয় নেতৃত্বের কাছে সম্ভাব্য প্রার্থীদের সততা ও যোগ্যতা, অর্থ ও পেশাজিঞ্জির কাছে পরাজিত হয়েছে। প্রশ্নবিদ্ধ হয়েছে মনোনয়ন প্রক্রিয়ার সাথে সম্পৃক্ত নেতৃত্বের সততাও। তৃতীয়ত, সুষ্ঠু নির্বাচন না হওয়ায়, 'এই দলের নেতৃত্বাধীন সরকারের অধীনে কখনও সুষ্ঠু নির্বাচন সম্ভব নয়' এই প্রচারণাটি পূর্বের চেয়ে অধিক বিশ্বাসযোগ্যতা পেতে পারে। চতুর্থত, দলগত নির্বাচনের সপক্ষে দলটির পক্ষ থেকে যেসকল যুক্তি দেখানো হয়েছিল, সংশ্লিষ্টদের বিতর্কিত আচরণের কারণে সেগুলোর প্রায়োগিকতা এখন প্রশ্নবিদ্ধ। পঞ্চমত, গণতান্ত্রিক চেতনায় আস্থাশীল না হয়ে দলীয় প্রার্থী বা দলের বিদ্রোহী প্রার্থীদের মধ্যে যেন-তেন প্রকারে নির্বাচনে জয়ী হওয়া ও বিজয়ী করার মরিয়া মনোভাব জনগণের কাছে স্পষ্ট হয়েছে। ষষ্ঠত, নির্বাচনকালে মহাজোট তথা ১৪ দলীয় জোটের শরিক দলগুলোর সাথেও দলটির বেপরোয়া ও হিংসাত্মক আচরণ পারস্পরিক আস্থাহীনতার কারণ হিসেবে আবির্ভূত হয়েছে।

এই নির্বাচনের মধ্য দিয়ে বাংলাদেশ জাতীয়তাবাদী দলেরও অনেক দুর্বলতা বেরিয়ে এসেছে। প্রথমত, দলটি যে অসংগঠিত ও বিশৃঙ্খল তা এই নির্বাচনের মধ্য দিয়ে প্রকাশিত হয়েছে; বেশির এলাকায় নির্বাচনের মাঠে দলটির নেতা-কর্মীদের সরব উপস্থিতি লক্ষ করা যায়নি। দ্বিতীয়ত, ত্যাগের মানসিকতা নিয়ে ভবিষ্যতে কঠিন ও ঝুঁকিপূর্ণ কোনো চ্যালেঞ্জ মোকাবেলা এই দলের নেতা-কর্মীদের পক্ষে সম্ভব কি না, প্রশ্নটি সামনে এসেছে। নির্বাচনের আগে থেকেই গ্রেপ্তার আতঙ্কে অনেক এলাকার নেতা-কর্মীরা ছিলেন এলাকাছাড়া। তৃতীয়ত, দলটির সাম্প্রতিক অতীতের আন্দোলন কৌশলের দুর্বলতার কারণে নেতা-কর্মীরা পূর্ণ শক্তি নিয়ে নির্বাচনী কর্মকাণ্ডে অংশগ্রহণের সুযোগ বঞ্চিত হয়েছে কি না এ প্রশ্ন জনমনে দেখা দিয়েছে। চতুর্থত, স্বাধীনতা বিরোধী তথা যুদ্ধাপরাধের সাথে সংশ্লিষ্ট দল ও ব্যক্তির সাথে সখ্যতার কারণে ভোটাররা বিশেষ করে তরুণ ভোটাররা তাদের থেকে মুখ ফিরিয়ে নিচ্ছে কি না, সচেতন মানুষদের মধ্যে এ প্রশ্নও উঠেছে। তবে, এত দুর্বলতা প্রকাশিত সত্ত্বেও বিএনপি'র কিছু লাভও হয়েছে। কেননা, এই নির্বাচনের মধ্য দিয়ে ক্ষমতাসীন দলের নেতা-কর্মীদের অগণতান্ত্রিক আচরণ, নির্বাচন কমিশনের নিরপেক্ষতা প্রশ্নবিদ্ধ হওয়া, কোথাও কোথাও নির্বাচনসংশ্লিষ্ট সরকারি কর্মকর্তা-কর্মচারি ও আইনশৃঙ্খলা রক্ষাকারী বাহিনী পক্ষপাতদুষ্টতা ইত্যাদি ভবিষ্যতে দলটির রাজনৈতিক ফায়দা আদায়ে সুযোগ বা পুঁজি হিসেবে কাজে আসতে পারে।

উল্লেখ্য, ফলাফলের ক্ষেত্রে একটি বিষয় বিবেচ্য যে, নির্বাচনে অংশগ্রহণকারী সকল দল ও প্রার্থীরা প্রতিযোগিতার জন্য 'লেভেল প্লেয়িং ফিল্ড' পায়নি।

১.৯. চেয়ারম্যান পদে বিজয়ী নারী: প্রাপ্ত ফলাফলে চেয়ারম্যান পদে ২৯ জন নারীর নির্বাচিত হওয়ার তথ্য পাওয়া গিয়েছে। প্রথম ধাপে ৮জন, দ্বিতীয় ধাপে ৪জন, তৃতীয় ধাপে ২জন, চতুর্থ ধাপে ৩জন, পঞ্চম ধাপে ৭জন ও ষষ্ঠ ধাপে ৫জন নারী নির্বাচিত হয়েছেন। নির্বাচিত ২৯জনের মধ্যে ২৪জন বাংলাদেশ আওয়ামী লীগ এবং ১জন জাতীয় পার্টির মনোনীত প্রার্থী ছিলেন। এছাড়া ৪জন ছিলেন স্বতন্ত্র প্রার্থী। আওয়ামী লীগ থেকে নির্বাচিত ২৪ জনের মধ্যে ৬ জনই বিনা প্রতিদ্বন্দ্বিতায় নির্বাচিত হয়েছেন। বিজয়ী নারী চেয়ারম্যানদের নামের তালিকা নিম্নে প্রদত্ত হলো:

ক্রমিক	নাম	ইউনিয়ন	উপজেলা	জেলা	বিভাগ	রাজনৈতিক দল	মন্তব্য
প্রথম ধাপ:							
১	মর্জিনা বেগম	সোনাইলতলা	মংলা	বাগেরহাট	খুলনা	বাংলাদেশ আওয়ামী লীগ	বিনা প্রতিদ্বন্দ্বিতায় নির্বাচিত
২	বিউটি আক্তার	সন্তোষপুর	চিতলমারী				
৩	শিরীনা আখতার	ফকিরহাট	ফকিরহাট				
৪	মোরশেদা আক্তার	তেলিগাতী	মোড়েলগঞ্জ				
৫	তাছলিমা বেগম	রাটীপাড়া	কচুয়া				

৬	জেসমিন আক্তার	সিদ্ধকাঠি	নলছিটি সদর	বালকাঠি	বরিশাল		বিনা প্রতিনিধিত্ব নির্বাচিত
৭	প্রগতি মণ্ডল	দৈহারী	নেছারাবাদ	পিরোজপুর			
৮	সানজিদা আক্তার	মালখানগর	সিরাজদিখান	মুন্সিগঞ্জ	ঢাকা		
দ্বিতীয় ধাপ:							
১	নাছরিন সুলতানা	নওয়াপাড়া	যশোর সদর	যশোর	খুলনা	বাংলাদেশ আওয়ামী লীগ	
২	নাজনীন নাহার	রামনগর					
৩	রওশন আরা বেগম	বাহিরচর	ভেড়ামারা	কুষ্টিয়া			
৪	মৌসুমী আক্তার	নবীনগর (পূর্ব)	নবীনগর	ব্রাহ্মণবাড়িয়া	চট্টগ্রাম	স্বতন্ত্র	
তৃতীয় ধাপ:							
১	মোছাঃ ছনিয়া সবুর	রাজাপুর	বেলকুচি	সিরাজগঞ্জ	রাজশাহী	আওয়ামী লীগ	
২	নার্গিস আক্তার বুবলি	কুলাউড়া	কুলাউড়া	মৌলভীবাজার		স্বতন্ত্র	
চতুর্থ ধাপ:							
১	সম্পা মাহমুদ	হাটশহরীপুর	কুষ্টিয়া সদর	কুষ্টিয়া	খুলনা	বাংলাদেশ আওয়ামী লীগ	
২	সানজিদা সুলতানা	মরজাল	রায়পুরা	নরসিংদী	ঢাকা		
৩	তাহেরা খাতুন	রংছাতি	কলমাকান্দা	নেত্রকোণা	ময়মনসিংহ		
পঞ্চম ধাপ:							
১	শাহিদা মোশারফ	দুগুরা	আড়াইহাজার	নারায়ণগঞ্জ	ঢাকা	বাংলাদেশ আওয়ামী লীগ	বিনা প্রতিনিধিত্ব নির্বাচিত
২	মেহেদী হাচিনা পারভীন	রতনদিয়া	কালুখালী	রাজবাড়ী			
৩	সেলিনা জামান	চরআত্রা	নড়িয়া	শরিয়তপুর			
৪	নীলুফার ইয়াসমিন	নগর	বড়াইগ্রাম	নাটোর	রাজশাহী		
৫	মাজেদা খাতুন	জারিয়া	পূর্বধলা	নেত্রকোণা	ময়মনসিংহ		
৬	পারভীন হাসান প্রীতি	চৌহাট	ধামরাই	ঢাকা	ঢাকা	স্বতন্ত্র	
৭	মহসীনা হক	মোল্লারকান্দি	মুন্সীগঞ্জ সদর	মুন্সীগঞ্জ			
ষষ্ঠ ধাপ:							
১	তাসলিমা আক্তার	নলুয়া	সাতকানিয়া	চট্টগ্রাম	চট্টগ্রাম	বাংলাদেশ আওয়ামী লীগ	
২	মোছাঃ রোকসানা বেগম	দণ্ডেরবাজার	গফরগাঁও	ময়মনসিংহ	ময়মনসিংহ		
৩	জেসমিন নাহার রাণী	মেদুয়ারী	ভালুকা				
৪	শামছুল্লাহার	দেওরগাছা	চুনারুঘাট	হবিগঞ্জ	সিলেট		
৫	সুলতানা আখতার	মমিনপুর	রংপুর সদর	রংপুর	রংপুর	জাতীয় পার্টি	

চেয়ারম্যান পদে অতীতে নির্বাচিত নারীদের তথ্যের তুলনা করলে করে দেখা যায় যে, এবারের নির্বাচনেই সর্বোচ্চ সংখ্যক নারী চেয়ারম্যান পদে নির্বাচিত হয়েছেন। স্টেপস টুওয়ার্ডস ডেভেলপমেন্ট-এর তথ্য অনুযায়ী, ১৯৯৭ সালে ২৩ জন, ২০০৩ সালে ২২ জন এবং ২০১১ সালে নির্বাচনে ২৩ জন নারী চেয়ারম্যান পদে নির্বাচিত হয়েছিলেন। আমরা মনে করি ৪০০০জনের মধ্যে মাত্র ২৯জন (০.৭২%) জন নারীর নির্বাচিত হওয়া বিষয়টি ২০২০ সালের মধ্যে প্রতিটি রাজনৈতিক দলের সকল স্তরের কমিটিতে ৩৩ শতাংশ নারীর প্রতিনিধিত্ব নিশ্চিত করার অঙ্গীকার এবং নারীর ক্ষমতায়নের আকাঙ্ক্ষার সাথে সামঞ্জস্যপূর্ণ নয়। রাজনৈতিক দলসমূহকে বিষয়টি গুরুত্বের সাথে বিবেচনায় নেওয়া উচিত।

১.১০. আন্তর্জাতিক মানদণ্ডের বিচারে এবারের ইউনিয়ন পরিষদ নির্বাচন: এবারের ইউনিয়ন পরিষদ নির্বাচন কেমন হলো, তা আমরা আন্তর্জাতিক মানদণ্ডের ('সার্বজনীন মানবাধিকার সনদ' ও 'ইন্টারন্যাশনাল কনভেনশন অন সিভিল অ্যান্ড পলিটিক্যাল রাইটস') ভিত্তিতে

বিচার করে দেখতে পারি। যাতে বলা হয়েছে, ৫টি বিষয়ের নিরিখে বলা যায় নির্বাচন সৃষ্টি হয়েছে কি না। বিষয়গুলো হচ্ছে, ১. ভোটার তালিকা প্রস্তুতের প্রক্রিয়ায় যাঁরা ভোটার হওয়ার যোগ্য ছিলেন, তাঁরা ভোটার হতে পেরেছেন; ২. যাঁরা প্রার্থী হতে চেয়েছিলেন, তাঁরা প্রার্থী হতে পেরেছেন; ৩. ভোটারদের সামনে বিকল্প প্রার্থী ছিল; ৪ যাঁরা ভোট দিতে চেয়েছেন, তাঁরা স্বাধীনভাবে ভোট দিতে পেরেছেন এবং ৫. ভোট গ্রহণের প্রক্রিয়া ছিল স্বচ্ছ, কারসাজিমুক্ত ও বিশ্বাসযোগ্য। এই পাঁচটি মানদণ্ডের প্রত্যেকটির ক্ষেত্রেই যদি ‘হ্যাঁ বোধক’ উত্তর আসে, তবেই আমরা বলতে পারি যে নির্বাচন সৃষ্টি হয়েছে। কিন্তু এই নির্বাচনে আমরা তা বলতে পারছিলাম; কেননা প্রতিটি মানদণ্ডের উত্তরই এখানে ‘না বোধক’। উল্লেখ্য আমাদের দেশের ভোটার তালিকায় পুরুষ ও নারী ভোটারের অনুপাত প্রায় সমান হলেও ২০১৪ ও ২০১৫ সালের ভোটার তালিকা হালনাগাদের সময় নতুন ভোটারদের মধ্যে পুরুষ ও নারীর অনুপাত ছিল যথাক্রমে ৫৬:৪৪ এবং ৫৩:৪৭; যা বাস্তবসম্মত নয়।

১.১১. করণীয়: দলভিত্তিক স্থানীয় সরকার নির্বাচন ও কার্যকর স্থানীয় সরকারের বিষয়টি এক করে ভাবলে আমাদের সামনে দুটি অবশ্য করণীয় রয়েছে। তা হচ্ছে, এক. স্থানীয় সরকার ব্যবস্থাকে শক্তিশালীকরণ, দুই. ব্যাপক সংস্কারের মধ্য দিয়ে রাজনীতিতে সুস্থতা ফিরিয়ে আনা। স্থানীয় সরকার ব্যবস্থাকে শক্তিশালীকরণের ক্ষেত্রে প্রয়োজন একটি বলিষ্ঠ বিকেন্দ্রীকরণ কর্মসূচির মাধ্যমে আরও ক্ষমতা, দায়িত্ব ও সম্পদ দিয়ে স্থানীয় সরকার প্রতিষ্ঠানসমূহকে প্রকৃত অর্থেই শক্তিশালী করা। এক্ষেত্রে জাতীয় বাজেটের একটা উল্লেখযোগ্য অংশ স্থানীয় সরকার প্রতিষ্ঠানসমূহের নামে বরাদ্দ এবং জনসংখ্যার ভিত্তিতে বন্টন; জনঅংশগ্রহণমূলক প্রক্রিয়ায় স্থানীয় চাহিদার ভিত্তিতে উন্নয়ন পরিকল্পনা প্রণয়নের বাধ্যবাধকতা সৃষ্টি, প্রতিষ্ঠানসমূহের প্রকৃত চাহিদার ভিত্তিতে জনবল বৃদ্ধি; জনপ্রতিনিধিদের ভাতা যৌক্তিকতার নিরিখে সম্মানজনক পর্যায়ে উন্নীত করা; সংসদীয় রীতিতে প্রথমে সকলকে সদস্য হিসেবে নির্বাচিত করে পরে তাঁদের ভেতর থেকে গণতান্ত্রিক পদ্ধতিতে মেয়র, চেয়ারম্যান বা ভাইস চেয়ারম্যান নির্বাচিত করা; নারীদের জন্য ঘূর্ণায়মান পদ্ধতির আসন সংরক্ষণের ব্যবস্থা করা; স্থানীয় সরকার কমিশন গঠন করা; স্থানীয় সরকার প্রতিষ্ঠানসমূহকে সংসদ সদস্যদের প্রভাবমুক্ত করা; জনপ্রতিনিধিদের বিরুদ্ধে দায়েরকৃত কোনো মামলায় অভিযোগ গঠনের সাথে সাথেই সদস্যপদ বাতিলের বিধান বাতিল করা ইত্যাদি উদ্যোগ গ্রহণ করা প্রয়োজন। এছাড়াও স্থানীয় সরকার প্রতিষ্ঠানসমূহকে আইনানুযায়ী পদ্ধতিগতভাবে পরিচালনার উদ্যোগ গ্রহণ করা উচিত। এক্ষেত্রে ওয়ার্ড সভা, উন্মুক্ত বাজেট অধিবেশন, নিয়মানুযায়ী কর নির্ধারণ ও নিয়মিত কর আদায়, স্থায়ী কমিটি গঠন ও সক্রিয়করণ, হস্তান্তরিত বিভাগসমূহকে সংশ্লিষ্ট সকল স্থানীয় সরকার প্রতিষ্ঠানের কাছে হস্তান্তর ইত্যাদি বিষয়সমূহকে আইনানুযায়ী বাস্তবায়নের উদ্যোগ গ্রহণ করতে হবে।

রাজনৈতিক সংস্কারের ক্ষেত্রে দলের সংস্কারের কথা আগে ভাবতে হবে। এক্ষেত্রে রাজনৈতিক দলের অভ্যন্তরে গণতন্ত্রের চর্চা, দলের আয়-ব্যয়ের ক্ষেত্রে স্বচ্ছতা ও জবাবদিহিতা প্রতিষ্ঠা, সৎ-যোগ্য নেতাকর্মীদের গুরুত্ব সহকারে মূল্যায়ন করা ও দুর্বৃত্তদের বিতাড়িত করা, লেজুড়বৃত্তিক রাজনীতি বন্ধ করা, নির্দিষ্ট সময় পর পর সম্মেলন করা ও গণতান্ত্রিক পদ্ধতিতে নেতৃত্ব নির্বাচন করা, গণতান্ত্রিক পদ্ধতিতে তৃণমূলের নেতাকর্মীদের সিদ্ধান্তের ভিত্তিতে কমপক্ষে ৩ বছর ধরে দলের সঙ্গে যুক্ত আছেন এমন নেতা-কর্মীদের বিভিন্ন নির্বাচনে প্রার্থী হিসেবে মনোনয়ন দেওয়া ইত্যাদির মধ্য দিয়ে দলীয় রাজনীতিতে সুস্থতা তথা আদর্শের চর্চা ফিরিয়ে আনতে হবে।

রাজনৈতিক সংস্কারের আরেকটি গুরুত্বপূর্ণ দিক হচ্ছে নির্বাচন কমিশনকে প্রকৃত অর্থেই স্বাধীন ও শক্তিশালী একটি প্রতিষ্ঠানে পরিণত করা। এক্ষেত্রে সকল নির্বাচনকে অবাধ, নিরপেক্ষ ও অর্থবহ করার লক্ষ্যে যথাযথ নির্বাচনী আইন প্রণয়ন যেমন জরুরি, তেমনি জরুরি সৎ, দক্ষ ও সাহসী ব্যক্তিদের নির্বাচন কমিশনে নিয়োগ প্রদান। সাংবিধানিক আকাঙ্ক্ষা অনুযায়ী নির্বাচন কমিশনারদের নিয়োগে আইন প্রণয়ন এবং সেই আইন মোতাবেক পদ্ধতিগতভাবে কমিশনারদের নিয়োগ এখন সময়ের দাবি। উল্লেখ্য, আমাদের রাষ্ট্র পরিচালনার মূল দলিল মহান মুক্তিযুদ্ধের চেতনায় প্রণীত আমাদের সংবিধানে নির্বাচন কমিশনারদের নিয়োগের জন্য আইন প্রণয়ন করার কথা থাকলেও, সংবিধান প্রণয়নের ৪৪ বছর হয়ে গেলেও আমরা অদ্যাবধি সেই আইন প্রণয়ন করতে পারিনি। তাই অগ্রাধিকার ভিত্তিতে জাতিগতভাবে আমাদের এই বিষয়টিতে মনোনিবেশ করা প্রয়োজন, যাতে নতুন আইনের বিধানাবলী সাপেক্ষেই পরবর্তী মেয়াদের নির্বাচন কমিশনারদের নিয়োগ করা যায়। রাজনৈতিক সংস্কারের আর একটি বড় বিষয় হলো জনপ্রশাসন ও আইন-শৃঙ্খলা রক্ষাকারী বাহিনীকে দলীয়করণের প্রভাবমুক্ত করা। আমাদের দেশের প্রেক্ষাপটে রাজনৈতিক সংস্কারের ক্ষেত্রে সবচেয়ে জরুরি হচ্ছে গণতান্ত্রিক চেতনাকে সমৃদ্ধ রেখে আমাদের আচরণগত পরিবর্তন এবং গণতান্ত্রিক পরিবেশ সৃষ্টিসহ মুক্তিযুদ্ধের চেতনার ভিত্তিতে বহুমত-বহুপথের মানুষের শান্তিপূর্ণ সহাবস্থান নিশ্চিতকরণ।

পরিশেষে আমরা বলতে চাই যে, আশির দশকের একটি ধ্বংসস্তম্ভ থেকে তুলে এনে নব্বইয়ের দশকের গোড়ার দিক থেকে অব্যাহত প্রচেষ্টার মধ্য দিয়ে নির্বাচনী ব্যবস্থাকে আমরা পুরোপুরি পরিশুদ্ধ করে ফেলেছিলাম। এবারে যে ধরনের নির্বাচন আমরা প্রত্যক্ষ করলাম, তাতে জনমনে এই আশঙ্কার সৃষ্টি হয়েছে যে, আমরা কি নির্বাচন ব্যবস্থাকে আবারও ধ্বংসের দিকে নিয়ে যাচ্ছি? এই ইউনিয়ন পরিষদ নির্বাচন যদি ‘মডেল’ হিসেবে গ্রহণযোগ্যতা পায়, তবে সত্যি সত্যিই আমাদের নির্বাচনী ব্যবস্থা পুরোপুরি ভেঙ্গে পড়বে। ভেঙ্গে পড়বে আমাদের গণতান্ত্রিক ব্যবস্থাও – যা কারো জন্যই কল্যাণ বয়ে আনবে না।

তাই কালবিলম্ব না করে জাতীয় স্বার্থে এই নির্বাচনের বিভিন্ন দিক পর্যালোচনার জন্য একটি জাতীয় সংলাপের আয়োজন একান্ত জরুরি। সংলাপে সংশ্লিষ্ট সকল রাজনৈতিক দল, সরকারের নির্বাচন সংশ্লিষ্ট বিভাগসমূহ, নাগরিক সংগঠন, নির্বাচন পর্যবেক্ষণকারী প্রতিষ্ঠানগুলোসহ নির্বাচন সংশ্লিষ্ট সকলের অংশগ্রহণ নিশ্চিত করতে হবে। উক্ত সংলাপেই ইউনিয়ন পরিষদ নির্বাচনের খুটি-নাটি বিভিন্ন দিক নিয়ে খোলামেলাভাবে আলোচনা করতে হবে। কিভাবে নির্বাচনী ব্যবস্থাকে পুরোপুরিভাবে পরিশুদ্ধ করা যায়? ভবিষ্যতে স্থানীয় সরকার নির্বাচনগুলো দলভিত্তিক ভাবে হবে কি না? দলভিত্তিকভাবে হলে, কী ধরনের প্রস্তুতি আমাদের গ্রহণ করা উচিত? নির্বাচন কমিশনারদের নিয়োগের জন্য আইনটি কেমন হওয়া উচিত? আইনে সার্চ কমিটি থাকবে কি না? সার্চ কমিটি হলে, সেখানে কারা কারা থাকতে পারে? ইত্যাদি বিষয়সমূহ নিয়ে সংলাপে আলোচনা করে সরকারসহ সংশ্লিষ্ট সকলের করণীয় নির্ধারণে জন্য সুপারিশমালা প্রণয়ন এবং তা বাস্তবায়নে উদ্যোগী হতে হবে।

আশাকরি সকলের ঐক্যবদ্ধ প্রচেষ্টার মধ্য দিয়ে নিশ্চয়ই আমরা আমাদের নির্বাচনী ব্যবস্থাকে পরিশুদ্ধ করে গণতন্ত্রের ভিতকে সুদৃঢ় করতে সক্ষম হবো এবং আমাদের প্রিয় মাতৃভূমিকে মহান মুক্তিযুদ্ধের চেতনায় একটি সমৃদ্ধ দেশ হিসেবে গড়ে তুলতে পারবো।

সুজন পরিচালিত কার্যক্রম

ইউনিয়ন পরিষদ নির্বাচনকে সামনে রেখে সুজন মূলত দুই ধরনের কার্যক্রম পরিচালনা করেছে। কার্যক্রমগুলোর মধ্যে একটি ছিল অবাধ, নিরপেক্ষ ও অর্থবহ নির্বাচন অনুষ্ঠানের আহ্বান তুলে ধরা এবং পর্যবেক্ষণ তুলে ধরা জন্য সংবাদ সম্মেলন। অপরটি জনগণের মুখোমুখি অনুষ্ঠান। সুজন পরিচালিত কার্যক্রমের সংক্ষিপ্ত বিবরণ নিম্নে তুলে ধরা হলো।

২.১ সংবাদ সম্মেলন: আমরা ইউনিয়ন পরিষদ নির্বাচন ২০১৬ উপলক্ষে মোট ৬ টি সংবাদ সম্মেলন করি। ৬টি ধাপের নির্বাচনকে সামনে রেখে ৫টি এবং নির্বাচনের পর সংবাদ সম্মেলন করি। সংবাদ সম্মেলনগুলো ২ মার্চ ২০১৬, ২৮ মার্চ ২০১৬, ১৯ এপ্রিল ২০১৬, ৫ মে ২০১৬, ২৬ মে ২০১৬ এবং ১৬ জুন ২০১৬ তারিখে অনুষ্ঠিত হয়।

২.১.১ সুষ্ঠু, নিরপেক্ষ ও গ্রহণযোগ্য ইউনিয়ন পরিষদ নির্বাচন অনুষ্ঠানের আহ্বানে সংবাদ সম্মেলন: ‘স্থানীয় সরকার প্রতিষ্ঠানসমূহের নির্বাচন রাজনৈতিক দলভিত্তিক হওয়া উচিত নয়। রাজনৈতিক দলভিত্তিক স্থানীয় সরকার নির্বাচন বিরাজমান দুর্বৃত্তায়িত রাজনীতির নেতিবাচক প্রভাবকে গ্রামাঞ্চল তথা ঘরে ঘরে বিস্তৃত করবে’ – এমনি বক্তব্য তুলে ধরা হয় সুজন কর্তৃক আয়োজিত সংবাদ সম্মেলনে। আজ ২ মার্চ ২০১৬ সকাল ১১.০০টায়, ঢাকা রিপোর্টার্স ইউনিটিতে সুজন-সুশাসনের জন্য নাগরিক আয়োজিত সুষ্ঠু, নিরপেক্ষ ও গ্রহণযোগ্য ইউনিয়ন পরিষদ নির্বাচন অনুষ্ঠানের আহ্বানে এক সংবাদ সম্মেলনে সুজন নেতৃত্বদান এ মন্তব্য করেন। সংবাদ সম্মেলনে উপস্থিত ছিলেন সুজন সভাপতি এম হাফিজ উদ্দিন খান, সুজন সম্পাদক ড. বদিউল আলম মজুমদার এবং সুজন কেন্দ্রীয় সমন্বয়কারী দিলীপ কুমার সরকার প্রমুখ।

লিখিত বক্তব্যে দিলীপ কুমার সরকার বলেন, ‘নির্বাচন কমিশন ঘোষিত তফসিল অনুযায়ী, “আগামী ২২ মার্চ ২০১৬ থেকে ৪ জুন ২০১৬ পর্যন্ত সারাদেশের ৪,২৭৫টি ইউনিয়ন পরিষদের নির্বাচন অনুষ্ঠিত হতে যাচ্ছে। বাংলাদেশের ইতিহাসে এই প্রথমবারের মত ইউনিয়ন পরিষদ নির্বাচন দলীয় প্রতীকে (শুধুমাত্র চেয়ারম্যান পদে) অনুষ্ঠিত হচ্ছে এবং প্রধান প্রধান রাজনৈতিক দলসমূহ নির্বাচনে প্রতিদ্বন্দ্বিতা করছে। তাই দেশবাসীর বিশেষ দৃষ্টি রয়েছে এই নির্বাচনকে ঘিরে। মেয়াদোত্তীর্ণ হওয়ার পূর্বেই এই নির্বাচন অনুষ্ঠানের উদ্যোগ গ্রহণ করার জন্য আমরা সুজন-এর পক্ষ থেকে সরকার ও নির্বাচন কমিশনকে ধন্যবাদ জানাচ্ছি।’



তিনি বলেন, ‘নির্বাচন কমিশন সচিবালয়ের তথ্য অনুযায়ী, প্রথম ধাপের ৭৩৮টি ইউনিয়ন পরিষদের নির্বাচনে চেয়ারম্যান পদে মনোনয়নপত্র জমা দিয়েছেন মোট ৩,৫৬৮ জন। এর মধ্যে ১৬টি রাজনৈতিক দলের ১,৯০০ এবং স্বতন্ত্র ১,৬৬৮ জন। ৭৩৮টি ইউনিয়ন পরিষদের নির্বাচনের জন্য বাংলাদেশ আওয়ামী লীগ থেকে মনোনয়নপত্র জমা দিয়েছেন ৭৪১ জন প্রার্থী। খুলনা জেলার দিঘলিয়া উপজেলার যোগীপল, কুষ্টিয়া জেলার মিরপুর উপজেলার আমবাড়ীয়া এবং কক্সবাজার জেলার মহেশখালী উপজেলার কালারমারছড়া ইউনিয়ন পরিষদ নির্বাচনের জন্য বাংলাদেশ আওয়ামী লীগের দু জন করে চেয়ারম্যান প্রার্থী মনোনয়নপত্র জমা দিয়েছেন।’

তিনি বলেন, ‘ইউনিয়ন পরিষদ নির্বাচনকে সামনে রেখে ইতোমধ্যেই সেসকল অনিয়মের অভিযোগ উঠেছে, সেগুলোর মধ্যে মনোনয়ন বাণিজ্য; মনোনয়নপত্র দাখিলে বাধা দান ও ছিনিয়ে নেয়া; যাচাই-বাছাইয়ের সময় প্রভাবিত হয়ে বা অর্থের বিনিময়ে প্রার্থীতা বাতিল বা প্রার্থীতা বৈধকরণ; নির্বাচনে প্রতিদ্বন্দ্বিতা না করা বা প্রার্থীতা প্রত্যাহারের জন্য প্রার্থীকে ভয়-ভীতি প্রদর্শন ও মারধর করা, দৃশ্যমান অনিয়ম এমনকি অভিযোগ দায়েরের পরেও নির্বাচন কমিশন কর্তৃক ব্যবস্থা না নেয়া; এক ইউনিয়নে একটি রাজনৈতিক দল থেকে একাধিক প্রার্থী মনোনয়নপত্র দাখিল করলেও নির্বাচনী আইন অনুযায়ী সবগুলো বাতিল না হওয়া ইত্যাদি উল্লেখযোগ্য।’

তিনি আরও বলেন, ‘এছাড়াও নির্বাচনের তারিখ বেশ দূরে থাকলেও এখন থেকেই সংঘর্ষ শুরু হওয়া; ২৫টি ইউনিয়নে শুধুমাত্র ক্ষমতাসীন দল বাংলাদেশ আওয়ামী লীগ প্রার্থীদের এককভাবে মনোনয়নপত্র দাখিল; অনেক ইউনিয়নে বিএনপি থেকে নির্বাচনে প্রতিদ্বন্দ্বিতার জন্য প্রার্থী পাওয়া না যাওয়া; ১১৪টি ইউনিয়নে বিএনপি’র প্রার্থী না থাকা, অতীতের তুলনায় প্রার্থী সংখ্যা হ্রাস পাওয়া; দক্ষ, যোগ্য ও জনকল্যাণে নিবেদিত প্রার্থীর পরিবর্তে অনেক ইউনিয়নেই রাজনৈতিক দল থেকে অযোগ্য প্রার্থীদের মনোনয়ন প্রদানের অভিযোগ ইত্যাদি বিষয়গুলোকে আমরা নেতিবাচক বলে মনে করছি। ৭৩৮টি ইউনিয়নের মধ্যে মাত্র ১২ জন নারীর (৬ জন আওয়ামী লীগ ও ৬ জন বিএনপি থেকে) চেয়ারম্যান পদে মনোনয়নকেও আমরা উদ্বেগের বিষয় বলে মনে করছি।’

দিলীপ কুমার সরকার বলেন, ‘সুজন-এর পক্ষ থেকে আমরা চাই, একটি অবোধ, নিরপেক্ষ, শান্তিপূর্ণ ও অর্থবহ নির্বাচন করার ক্ষেত্রে নির্বাচন কমিশন যথাযথ ভূমিকা পালন করুক। এক্ষেত্রে নির্বাচনে প্রতিদ্বন্দ্বিতাকারী প্রার্থীসহ নির্বাচনের সঙ্গে সংশ্লিষ্ট সকলেই যাতে নির্বাচনী আচরণবিধি যথাযথভাবে মেনে চলেন, সে ব্যাপারে নির্বাচন পরিচালনাকারী প্রতিষ্ঠান হিসেবে নিরপেক্ষতা ও সাহসিকতার সাথে কঠোর ভূমিকা পালন করতে হবে নির্বাচন কমিশনকে। পাশাপাশি সকল দল ও প্রার্থীর জন্য ‘লেভেল প্লেয়িং ফিল্ড’ নিশ্চিত করতে হবে। কালোটাকা ও পেশিজ্ঞির প্রভাবমুক্ত নির্বাচন অনুষ্ঠানে প্রয়োজনীয় সকল পদক্ষেপ গ্রহণ করতে হবে। আইন-শৃঙ্খলা রক্ষাকারী বাহিনীসহ নির্বাচনী দায়িত্বে নিয়োজিত কর্মকর্তা-কর্মচারীদের নিরপেক্ষতা নিশ্চিত করতে হবে। কেউ নিরপেক্ষতা ভঙ্গ করলে তাৎক্ষণিকভাবে তার বিরুদ্ধে শাস্তিমূলক ব্যবস্থা গ্রহণ করতে হবে।’

এম হাফিজউদ্দিন খান বলেন, ‘২০১৩ সালের পর এ নির্বাচন কমিশনের অধীনে কোনো নির্বাচন সুষ্ঠু হয়নি। সরকার থেকে নির্বাচন কমিশনকে সহযোগিতা করা হচ্ছে না। মানসম্মত নির্বাচন না হওয়ায় প্রার্থীদের নির্বাচন কমিশনের ওপর আস্থা নেই। তারা আগ্রহ হারিয়ে ফেলেছেন। তাই সরকারের পক্ষ থেকে নির্বাচন কমিশনকে সুষ্ঠুভাবে নির্বাচন করার সুযোগ দিতে হবে।’ তিনি বলেন, ‘আমরা সুজন-এর পক্ষ থেকে বলেছি যে, দলভিত্তিক স্থানীয় সরকার নির্বাচনের ফলাফল শুভ হয় না। আমরা বিগত পৌর নির্বাচনে সেটিই লক্ষ করেছি।’ তাই স্থানীয় সরকার নির্বাচন দলভিত্তিক করার সিদ্ধান্ত যুক্তিযুক্ত হয়নি বলে মন্তব্য করেন তিনি।

ড. বদিউল আলম মজুমদার বলেন, ‘ইউনিয়ন পরিষদ নির্বাচনে হলফনামা প্রদানের কোন বাধ্যবাধকতা নেই। আমরা কয়েকজন মিলে হাইকোর্টে এ বিষয়ে মামলা করেছিলাম। যেদিন এ মামলার রায় হওয়ার কথা সেদিন সিনিয়র জাজকে আপিল বিভাগে নিয়ে যাওয়া হয়, যার ফলে রায় হয়নি। গত কয়েক বছর ধরে আমরা চেষ্টা করেও এ সংক্রান্ত শুনানি করাতে পারিনি। ইউনিয়ন পরিষদ নির্বাচনের পর আমরা এ বিষয়ে আবারো উদ্যোগ নিবো।’ তিনি বলেন, ‘স্থানীয় সরকার জনগণের দোরগোড়ার সরকার। আর তাই এ নির্বাচনে যদি সং ও যোগ্য লোক নির্বাচিত হয়ে না আসে, তাহলে তা আপামর জনগণের জন্য কখনোই কল্যাণ বয়ে আনবে না।’ সংবিধানের উদাহরণ দিয়ে তিনি বলেন, ‘প্রজাতন্ত্র হবে গণতন্ত্র, গণতন্ত্রের জন্য নির্বাচন দরকার। আর নির্বাচন হতে হবে, সুষ্ঠু ও গ্রহণযোগ্য।’ ড. মজুমদার আরও বলেন, ‘এবারে নির্বাচনে প্রার্থীর সংখ্যা গড়ে ৪.৮২%। অথচ গতবার ইউপি নির্বাচনে চূড়ান্ত প্রার্থী ছিল ছয়ের মত। অর্থাৎ এ নির্বাচনে প্রার্থী সংখ্যা গতবারের তুলনায় কমে গেছে, যা শুভ লক্ষণ নয়।’

২.১.২ ইউনিয়ন পরিষদ নির্বাচন: দৃশ্যপট ও শিক্ষণীয় শীর্ষক সংবাদ সম্মেলন: ‘প্রথম ধাপের ইউনিয়ন পরিষদ নির্বাচনে সহিংসতা রোধে নির্বাচন কমিশন ব্যর্থ হয়েছে। এমনকি গণমাধ্যমে মনোনয়নপত্র জমাদান-সহ বিভিন্ন বিষয়ে ব্যাপক অনিয়মের সংবাদ প্রকাশিত হলেও কমিশন যথাযথ পদক্ষেপ নেয়নি’ বলে মন্তব্য করেছেন সুজন-সুশাসনের জন্য নাগরিক নেতৃবৃন্দ। আজ ২৮ মার্চ ২০১৬ সকাল ১১.০০টায়, ঢাকা রিপোর্টার্স ইউনিটিতে সুজন আয়োজিত “ইউনিয়ন পরিষদ নির্বাচন: দৃশ্যপট ও শিক্ষণীয়” শীর্ষক এক সংবাদ সম্মেলনে সুজন নেতৃবৃন্দ এসব মন্তব্য করেন। সংবাদ সম্মেলনে উপস্থিত ছিলেন সুজন সম্পাদক ড. বদিউল আলম মজুমদার, সহ-সম্পাদক জনাব জাকির হোসেন, নির্বাহী সদস্য প্রকৌশলী মুসবাহ আলীম এবং সুজন কেন্দ্রীয় সমন্বয়কারী দিলীপ কুমার সরকার প্রমুখ।

লিখিত বক্তব্যে দিলীপ কুমার সরকার বলেন, “ব্যাপক সহিংসতার মধ্য দিয়ে প্রথম ধাপে অনুষ্ঠিত হলো ৭১২টি ইউনিয়ন পরিষদ নির্বাচন। ৩৬টি জেলায় অনুষ্ঠিত এই নির্বাচনে ৩২টিতেই সহিংসতা ও অনিয়মের অভিযোগ উঠেছে। নির্বাচনের দিনেই বিভিন্ন ঘটনায় আইনশৃঙ্খলা রক্ষাকারী বাহিনীর গুলি এবং প্রতিদ্বন্দ্বী প্রার্থীর সমর্থকদের মধ্যে সংঘর্ষে নিহত হয়েছেন ১১ জন এবং আহত হয়েছেন সহস্রাধিক। অনিয়মের কারণে ভোট গ্রহণ স্থগিত করা হয় ৬৫টি কেন্দ্রে। ভোট গ্রহণ নির্বাচনের পরের দুইদিনে নির্বাচনের দিনে আহত আরও তিনজন-সহ নির্বাচনী সহিংসতায় নিহত হয়েছেন ৬ জন। আহতদের মধ্যে শতাধিক আইনশৃঙ্খলা রক্ষাকারী বাহিনীর



সদস্যও রয়েছেন বলে জানা গিয়েছে। তফসিল ঘোষণার পর থেকে নির্বাচনের পূর্বেই সারাদেশের অনেক এলাকায় প্রতিদ্বন্দ্বী প্রার্থীদের সমর্থকদের মধ্যে সংঘর্ষে নিহত হয়েছেন ১০ জন এবং আহত হয়েছেন দুই সহস্রাধিক। সব মিলিয়ে এ পর্যন্ত নিহতের সংখ্যা ২৭ এবং আহত সাড়ে তিন হাজারেরও অধিক। তবে ২২ মার্চ অনুষ্ঠিত নির্বাচনে ব্যাপক সহিংস ঘটনা ঘটলেও ২৩ মার্চ টাঙ্গাইল জেলার নাগরপুর উপজেলাধীন ১১টি ইউনিয়নে অনুষ্ঠিত নির্বাচন শান্তিপূর্ণভাবে হয়েছে বলে জানা গিয়েছে।”

তিনি বলেন, “প্রার্থী মনোনয়ন প্রক্রিয়া পর্যবেক্ষণ করতে গিয়ে আমরা দেখেছি যে,

অনেক স্থানের বিএনপি মনোনীত প্রার্থী এবং আওয়ামী লীগের সম্ভাব্য বিদ্রোহী প্রার্থীরা ভয়-ভীতি প্রদর্শন, বাধা দান, কেড়ে নেওয়া বা ছিড়ে ফেলার কারণে মনোনয়নপত্র জমা দিতে পারেননি। কেউ কেউ মনোনয়নপত্র দাখিল করলেও ভয়-ভীতি প্রদর্শন ও চাপ সৃষ্টির কারণে প্রত্যাহার করতে বাধ্য হয়েছেন। ছোট-খাটো বা সংশোধনযোগ্য ত্রুটির কারণে যাচাই-বাছাই কালে বাতিল হয়ে গেছে অনেকের মনোনয়নপত্র। ফলে একদিকে যেমন বিনা প্রতিদ্বন্দ্বিতায় নির্বাচিত হওয়ার ঘটনা ব্যাপকহারে (৫৪টি) ঘটেছে, অন্যদিকে ব্যাপক সংখ্যক ইউনিয়নে (১২১টি) বিএনপি’র প্রার্থী না থাকার ঘটনা ঘটেছে।”

দিলীপ কুমার সরকার বলেন, “সুষ্ঠু ও গ্রহণযোগ্য নির্বাচনে আইন-শৃঙ্খলারক্ষাকারী বাহিনী, প্রশাসন তথা সরকারের ভূমিকা অপরিহার্য। একইসাথে রাজনৈতিক দলের সদাচারণও অত্যধিক গুরুত্বপূর্ণ। তবে সুষ্ঠু ও গ্রহণযোগ্য নির্বাচনের সবচেয়ে বড় দায় নির্বাচন কমিশনের। নির্বাচন কমিশনকে মনে রাখতে হবে যে, নির্বাচন পরিচালনার ক্ষেত্রে সর্বময় ক্ষমতার অধিকারী তাঁরাই। সুষ্ঠু নির্বাচন নিশ্চিত করা তাঁদেরই দায়িত্ব। আমরা সকলেই মনে করি যে, নির্বাচন কমিশনকেই এ দায়িত্ব পালন করতে হবে।

আমরা সকলকে এও মনে করিয়ে দিতে চাই যে, মহান মুক্তিযুদ্ধের চেতনায় প্রণীত আমাদের রাষ্ট্র পরিচালনার মূল দলিল পবিত্র সংবিধানে ‘গণতন্ত্র’কে রাষ্ট্রের মূলনীতি হিসেবে ঘোষণা করা হয়েছে। আর নির্বাচন হচ্ছে গণতন্ত্রের প্রথম ধাপ। তাই কোনো অবস্থাতেই নির্বাচন পদ্ধতিকে ধ্বংস হতে দেওয়া যাবে না।”

প্রথম দফা ইউনিয়ন পরিষদ নির্বাচনকে একটি বিকৃত নির্বাচন বলে অভিহিত করে ড. বদিউল আলম মজুমদার বলেন, “এ নির্বাচনকে বিকৃত বলার প্রধান তিনটি কারণ রয়েছে, যা প্রথমত, এতকাল মনোনয়ন বাণিজ্য ছিলো উপরের তলায়, এবারের নির্বাচনে মনোনয়ন বাণিজ্য তৃণমূলে ছড়িয়ে গিয়েছে। দ্বিতীয়ত, এবারের নির্বাচনে সহিংসতার মাত্রা নিকট অতীতের সকল নিবাচনের সহিংসতার মাত্রাকে ছাড়িয়ে যাবার আশঙ্কা প্রকট। এবারের নির্বাচনে সহিংসতার ধরনও ভিন্ন। আগে নির্বাচনের দিনে সহিংসতা ঘটতো, কিন্তু এবার সহিংসতা দীর্ঘমেয়াদি এবং সহিংসতা দেখা দিয়েছে ক্ষমতাসীন দলের লোকজনদের মধ্যে বেশি। তৃতীয়ত, নির্বাচন মানেই প্রতিদ্বন্দ্বিতামূলক নির্বাচন, কিন্তু এবারের নির্বাচন ছিল প্রায় প্রতিযোগিতাহীন। নির্বাচনে বিনা প্রতিদ্বন্দ্বিতায় নির্বাচনের যে হার তাই এ নির্বাচনকে বিকৃত নির্বাচন বলাই স্বাভাবিক।” তিনি আরও বলেন, “সুষ্ঠু ও গ্রহণযোগ্য নির্বাচন অনুষ্ঠানে নির্বাচন কমিশন চরমভাবে ব্যর্থ হয়েছে। কমিশন বলেছে তারা ব্যর্থতার দায় নেবে না। এখন কমিশন যদি দায় না নেয় এ দায় কে নেবে?।”

জনাব জাকির হোসেন বলেন, “সুষ্ঠু, নিরপেক্ষ নির্বাচন আয়োজনে নির্বাচন কমিশন ও সরকারের পাশাপাশি রাজনৈতিক দলের ভূমিকাও অত্যন্ত গুরুত্বপূর্ণ। কিন্তু আমরা দেখেছি যে, কেন্দ্র দখল, ব্যালট বাক্স ছিনতাইয়ের যে মহোৎসব দেখা দিয়েছে তা একটি রাজনৈতিক দলের ক্ষমতার প্রভাবের কারণেই ঘটেছে। সুতরাং আমাদের রাজনৈতিক দলগুলোকেও দায়বদ্ধতার পরিচয় দিতে হবে।”

২.১.৩ ‘ইউনিয়ন পরিষদ নির্বাচনের হালচাল ও করণীয়’ শীর্ষক সংবাদ সম্মেলন: ‘প্রথম ধাপের মত দ্বিতীয় ধাপের ইউনিয়ন পরিষদ নির্বাচনেও সহিংসতা রোধে নির্বাচন কমিশন ব্যর্থ হয়েছে। এমনকি গণমাধ্যমে মনোনয়নপত্র জমাদান-সহ বিভিন্ন বিষয়ে ব্যাপক অনিয়মের সংবাদ প্রকাশিত হলেও কমিশন যথাযথ পদক্ষেপ নেয়নি’ বলে মন্তব্য করেছেন সুজন-সুশাসনের জন্য নাগরিক নেতৃবৃন্দ। আজ ১৯ এপ্রিল ২০১৬ সকাল ১১.০০টায়, ঢাকা রিপোর্টার্স ইউনিটিতে সুজন আয়োজিত ‘ইউনিয়ন পরিষদ নির্বাচনের হালচাল ও

করণীয়' শীর্ষক এক সংবাদ সম্মেলনে সুজন নেতৃবৃন্দ এসব মন্তব্য করেন। সংবাদ সম্মেলনে উপস্থিত ছিলেন সুজন সম্পাদক ড. বদিউল আলম মজুমদার, জাতীয় কমিটির সদস্য জনাব মুহাম্মদ জাহাঙ্গীর এবং সুজন কেন্দ্রীয় সমন্বয়কারী দিলীপ কুমার সরকার প্রমুখ।



হয়।'

গত ৪ এপ্রিল ২০১৬ তারিখে দৈনিক ইত্তেফাকে প্রকাশিত এক প্রতিবেদনের উল্লেখ করে তিনি বলেন, '১৯৯৭ সালে অনুষ্ঠিত নির্বাচনে ৩১ জনের প্রাণহানি ঘটে, ২০০৩ সালে ২৩ জনের এবং ২০১১ সালে ২৯ মার্চ থেকে শুরু হয়ে জুলাইয়ে শেষ হওয়া ইউপি নির্বাচনে ১০ জন নিহত হয় বলে জানিয়েছে ইসি সচিবালয়ের সংশ্লিষ্টরা। অতীতের সব নির্বাচনের তুলনায় এবারের সহিংসতার মাত্রা অনেক বেশি। এবারের এখন পর্যন্ত (দুই ধাপে) নিহতের সংখ্যা দাড়িয়েছে ৪০ জন। সাড়ে চার হাজার ইউনিয়নের মধ্যে মাত্র ১৩শ ইউপিতে ভোট হয়েছে, তাতেই এত প্রাণহানি। যেহাে সহিংসতা হচ্ছে তাতে আশঙ্কা করা হচ্ছে ভবিষ্যতে এর পরিমাণ আরও বাড়বে।'

বিনা প্রতিদ্বন্দ্বিতায় নির্বাচিতদের ব্যাপারে তিনি বলেন, 'চেয়ারম্যান পদে ১৯৮৮ সালে ১০০ জন, ১৯৯৭ সালে ৩৭ জন এবং ২০০৩ সালে ৩৪ জন বিনা প্রতিদ্বন্দ্বিতায় নির্বাচিত হয়েছেন। ২০১১ সালের ইউপি নির্বাচন সম্পর্কে নির্বাচন কমিশন কোনো প্রতিবেদন প্রকাশ করেনি। তবে কমিশনের কর্মকর্তাদের সূত্র ধরে প্রতিবেদনে বলা হয়, ২০১১ তে এমন কোনো উল্লেখযোগ্য ঘটনা ছিল না। এবারের নির্বাচনে প্রথম তিন ধাপেই বিনা প্রতিদ্বন্দ্বিতায় নির্বাচিত চেয়ারম্যানের সংখ্যা ১১৩ তে পৌঁছে গিয়েছে।'

দিলীপ কুমার সরকার বলেন, 'পরবর্তী ধাপের নির্বাচনগুলো সুষ্ঠুভাবে আয়োজন করতে হলে এখন থেকেই সংশ্লিষ্ট সকলকেই যথাযথ ভূমিকা রাখতে হবে। এজন্য প্রথম ও দ্বিতীয় ধাপের নির্বাচনের অভিজ্ঞতা থেকে শিক্ষা নিয়ে, নির্বাচন কমিশন, সরকার ও রাজনৈতিক দলসহ সংশ্লিষ্ট সকলেই যদি স্ব স্ব অবস্থানে থেকে অর্পিত দায়িত্ব যথাযথভাবে পালন করে, শুধুমাত্র তবেই পরবর্তী ধাপের নির্বাচনগুলো ভালো হতে পারে, অন্যথায় নয়। নির্বাচন কমিশনকে সব সময়ই মনে রাখতে হবে যে, নির্বাচন পরিচালনার ক্ষেত্রে সর্বময় ক্ষমতার অধিকারী তারাি। সুষ্ঠু নির্বাচন নিশ্চিত করার দায়িত্ব তাদেরই। তাই, সাহসিকতার সাথে তাদেরকে ক্ষমতা প্রয়োগ করতে হবে। নইলে, জাতি তাদের ক্ষমা করবে না।'

প্রথম দফা ইউনিয়ন পরিষদ নির্বাচনকে একটি বিকৃত নির্বাচন বলে অভিহিত করে ড. বদিউল আলম মজুমদার বলেন, 'ইউনিয়ন পরিষদ নির্বাচনে হলফনামা প্রদানের কোন বাধ্যবাধকতা নেই। আমরা কয়েকজন মিলে হাইকোর্টে এ বিষয়ে মামলা করেছিলাম। যেদিন এ মামলার রায় হওয়ার কথা সেদিন সিনিয়র জজকে আপিল বিভাগে নিয়ে যাওয়া হয়, যার ফলে রায় হয়নি। গত কয়েক বছর ধরে আমরা চেষ্টা করেও এ সংক্রান্ত শুনানি করাতে পারিনি। ইউনিয়ন পরিষদ নির্বাচনের পর আমরা এ বিষয়ে আবারো উদ্যোগ নিবো।' তিনি বলেন, 'নির্বাচন একদিনের বিষয় নয়, এটি একটি দীর্ঘমেয়াদি প্রক্রিয়া। আমরা মনে করি যে, নির্বাচন সম্পর্কে নির্বাচন কমিশনের ধারণা স্পষ্ট নয়। তারা আমাদের চোখে ধুলো দেওয়ার চেষ্টা করেছে।' কমিশনই সুষ্ঠু ও গ্রহণযোগ্য নির্বাচনের পথে বড় বাঁধা বলে মন্তব্য করেন তিনি।

মুহাম্মদ জাহাঙ্গীর বলেন, 'সরকার ও নির্বাচন কমিশন দাবি করছে যে, দু-একটি বিচ্ছিন্ন ঘটনা ছাড়া নির্বাচন সুষ্ঠু ও গ্রহণযোগ্য হয়েছে। কিন্তু তা সত্য নয়। কারণ সহিংসতার বহু চিত্র পত্র-প্রত্রিকায় প্রকাশিত হয়েছে, যা সুজন-এর মূল প্রবন্ধে তুলে ধরা হয়েছে।

লিখিত বক্তব্যে দিলীপ কুমার সরকার বলেন, 'ইউনিয়ন পরিষদের দ্বিতীয় ধাপের নির্বাচনও ব্যাপক সহিংসতা ও অনিয়মের মধ্য দিয়ে অনুষ্ঠিত হয়েছে। এই ধাপে নির্বাচনের দিন নিহত হয়েছে ৯ জন এবং আহত হয়েছে কয়েক শত মানুষ। নির্বাচনী তফসিল ঘোষণার পর থেকে নির্বাচনী সহিংসতায় এখন পর্যন্ত বারে গিয়েছে ৫৬ জনের প্রাণ এবং আহত হয়েছে প্রায় পাঁচ হাজার জন। দ্বিতীয় ধাপে মোট ৬৩৯টি ইউনিয়নের নির্বাচন অনুষ্ঠিত হয়। ৪৭টি জেলায় অনুষ্ঠিত এই নির্বাচনে ৩৯টি জেলাতেই সহিংসতা ও অনিয়মের ঘটনা ঘটেছে। এই নির্বাচনে ৩৭টি কেন্দ্রের ভোট গ্রহণ স্থগিত করা

এ রকম অনিয়ম যদি প্রতিষ্ঠিত হয়ে যায়, তাহলে ২০১৯ সালে যে জাতীয় নির্বাচন অনুষ্ঠিত হবে তা নিয়ে আমাদের উৎকর্ষিত না হবার কোনো কারণ নেই। এরকম চলতে থাকলে আমাদের নির্বাচনী প্রক্রিয়া ধ্বংস হতে বাধ্য, যা আমাদের কারোরই কাম্য নয়।’

২.১.৪ ‘চলমান ইউনিয়ন পরিষদ নির্বাচনের চালচিত্র’ শীর্ষক সংবাদ সম্মেলন: ‘আমরা এক বিকৃত ইউনিয়ন পরিষদ নির্বাচন পরিলক্ষিত করছি এবং আমাদের নির্বাচনী ব্যবস্থা অনেকটাই ভেঙ্গে পড়েছে। এই ধারাবাহিকতা বজায় থাকলে ২০১৯ সালের জাতীয় সংসদ নির্বাচন নিয়ে শঙ্কিত হবার যথেষ্ট কারণ রয়েছে’ বলে মন্তব্য করেছেন সুজন-সুশাসনের জন্য নাগরিক-এর নেতৃবৃন্দ। আজ ৫ মে ২০১৬ সকাল ১১.০০টায়, ঢাকা রিপোর্টার্স ইউনিটিতে সুজন আয়োজিত ‘ইউনিয়ন পরিষদ নির্বাচনের হালচাল ও করণীয়’ শীর্ষক এক সংবাদ সম্মেলনে সুজন নেতৃবৃন্দ এ মন্তব্য করেন।

সংবাদ সম্মেলনে সভাপতিত্ব করেন সুজন সভাপতি এম হাফিজউদ্দীন খান। উপস্থিত ছিলেন সুজন সম্পাদক ড. বদিউল আলম মজুমদার, সুজন জাতীয় কমিটির সদস্য জনাব মুহাম্মদ জাহাঙ্গীর এবং সুজন কেন্দ্রীয় সমন্বয়কারী দিলীপ কুমার সরকার প্রমুখ।



লিখিত বক্তব্যে দিলীপ কুমার সরকার বলেন, ‘বিভিন্ন কারণে চলমান ইউনিয়ন পরিষদ নির্বাচন জনগণের দৃষ্টি কেড়েছে। কারণগুলোর মধ্যে ব্যাপক সহিংসতা ও প্রাণহানি, মনোনয়ন বাণিজ্যের ব্যাপকতা, রেকর্ড সংখ্যক ইউনিয়নে বিনা প্রতিদ্বন্দ্বিতায় নির্বাচিত হওয়া, একটি বড় রাজনৈতিক দল কর্তৃক অনেক ইউনিয়নে প্রার্থী দিতে না পারা, এক দলকেন্দ্রিক ফলাফল, সংখ্যালঘু সম্প্রদায়ের হামলা-নির্ধাতন ইত্যাদি উল্লেখযোগ্য। এক কথায় বলতে গেলে ব্যাপক অনিয়মের কারণে এই নির্বাচন এখন আলোচনার কেন্দ্রবিন্দুতে। ফলে

ব্যাপক সমালোচনার মুখেও পড়তে হয়েছে নির্বাচন কমিশনকে। সমালোচনার মুখে পড়েছে সরকার ও রাজনৈতিকগুলোও, বিশেষ করে ক্ষমতাসীন দল বাংলাদেশ আওয়ামী লীগ।’

নির্বাচনী সহিংসতায় প্রাণহানি সম্পর্কে তিনি বলেন, ‘এবার নির্বাচনী তফসিল ঘোষণার পর থেকে এ পর্যন্ত নির্বাচনপূর্ব, নির্বাচনকালীন ও নির্বাচন পরবর্তী সংঘর্ষ এবং নির্বাচনকেন্দ্রিক বিরোধের জেরে এ পর্যন্ত ৭১ জনের প্রাণহানি ঘটেছে। আহতের সংখ্যা ছয় সহস্রাধিক। প্রাণহানির তথ্য পর্যালোচনা করে দেখা যায় যে, প্রথম ধাপের নির্বাচনের পূর্বে ১০ জন, প্রথম ধাপের নির্বাচনের দিন ১১ জন, প্রথম ধাপের নির্বাচনের পর থেকে দ্বিতীয় ধাপের নির্বাচনের পূর্ব পর্যন্ত ১১ জন, দ্বিতীয় ধাপের নির্বাচনের দিন ৯ জন, দ্বিতীয় ধাপের নির্বাচনের পর থেকে তৃতীয় ধাপের নির্বাচনের পূর্ব পর্যন্ত ১৭ জন, তৃতীয় ধাপের নির্বাচনের দিন ৫ জন, তৃতীয় ধাপের নির্বাচনের পর থেকে এ পর্যন্ত ৮ জনের মৃত্যু হয়েছে।’

দিলীপ কুমার সরকার বিনা প্রতিদ্বন্দ্বিতায় নির্বাচিত হওয়া সম্পর্কে বলেন, ‘চেয়ারম্যান পদে বিনা প্রতিদ্বন্দ্বিতায় নির্বাচিত হওয়ার বিষয়টি ইতোমধ্যেই সর্বকালের রেকর্ড ছাড়িয়েছে। ইতোপূর্বে ১৯৮৮ সালের ইউনিয়ন পরিষদ নির্বাচনে সর্বোচ্চ ১০০ জন প্রার্থী বিনা প্রতিদ্বন্দ্বিতায় নির্বাচিত হয়েছিলেন বলে জানা গেছে। প্রথম ধাপ থেকে শুরু করে চতুর্থ ধাপের মনোনয়নপত্র যাচাই-বাছাই ও প্রত্যাহারের পর এই সংখ্যা ১৫০-এ দাঁড়িয়েছে। প্রথম ধাপে ৫৪ জন, দ্বিতীয় ধাপে ৩৪ জন, তৃতীয় ধাপে ২৯ জন এবং চতুর্থ ধাপে ৩৩ জন চেয়ারম্যান প্রার্থী বিনা প্রতিদ্বন্দ্বিতায় নির্বাচিত হয়েছেন বলে জানা গিয়েছে। এরা সকলেই ক্ষমতাসীন বাংলাদেশ আওয়ামী লীগের প্রার্থী। অপরদিকে চার ধাপে অনুষ্ঠিত নির্বাচনে চেয়ারম্যান পদে বাংলাদেশ জাতীয়তাবাদী দলের প্রার্থীশূন্য ছিল বা আছে মোট ৩৮৮টি ইউনিয়নে। প্রথম ধাপে ১১৯, দ্বিতীয় ধাপে ৭৯ এবং তৃতীয় ধাপে ৮১টি ইউনিয়নে বিএনপি’র প্রার্থীশূন্য ছিল। চতুর্থ ধাপেও ১০৯টি ইউনিয়নে বিএনপির প্রার্থী নেই বলে জানা গিয়েছে। অনেক স্থানে ভয়-ভীতি প্রদর্শন, মনোনয়নপত্র জমাদানে বাধা প্রদান, মনোনয়নপত্র কেড়ে নেওয়া বা ছিঁড়ে ফেলার কারণে বিএনপি প্রার্থীরা মনোনয়নপত্র জমা দিতে পারেননি। কেউ কেউ মনোনয়নপত্র দাখিল করলেও ভয়-ভীতি প্রদর্শন ও চাপ সৃষ্টির কারণে প্রত্যাহার করতে বাধ্য হয়েছেন।’

মূল প্রবন্ধে তিনি বলেন, ‘ইউপি নির্বাচনে অস্বাভাবিক হারে ভোট পড়ারও অভিযোগ উঠেছে কোথাও কোথাও। প্রথম ধাপের নির্বাচনে ৬টি ইউনিয়নে এবং তৃতীয় ধাপের নির্বাচনে ৭টি ইউনিয়নে চেয়ারম্যান পদে ৯০ শতাংশের বেশি ভোট পড়েছে।’

নির্বাচনে মনোনয়ন বাণিজ্য সম্পর্কে তিনি বলেন, ‘প্রথমবারের মত স্থানীয় সরকার নির্বাচনেও রাজনৈতিক দল, বিশেষ করে ক্ষমতাসীন দলের বিরুদ্ধে ব্যাপক মনোনয়ন বাণিজ্যের অভিযোগ উঠেছে। এ নিয়ে প্রায় প্রতিদিনই গণমাধ্যমে প্রতিবেদন প্রকাশিত

হচ্ছে। অধিকাংশ এলাকায় স্থানীয় সংসদ সদস্য এবং জেলা ও উপজেলা আওয়ামী লীগের প্রভাবশালী নেতাদের বিরুদ্ধে উঠেছে এ অভিযোগ। শুধুমাত্র আওয়ামী লীগেই নয়, বিএনপিতেও মনোনয়ন বাণিজ্যের অভিযোগ রয়েছে। দেশের উত্তরাঞ্চলীয় একজন সাবেক উপমন্ত্রীর বিরুদ্ধে জমি দলিল করে নেওয়ার বিনিময়ে মনোনয়ন প্রদানের অভিযোগ উঠেছে। আর মনোনয়ন বাণিজ্যের কারণে একদিকে আমাদের রাজনৈতিক অঙ্গন কলুষিত হচ্ছে, অন্যদিকে তৃণমূলের স্থানীয় সরকার প্রতিষ্ঠানটির জনকল্যাণমুখী ভূমিকা পালনের সম্ভাবনাও বিনষ্ট হচ্ছে। কেননা, জনকল্যাণে নিবেদিত হওয়া সত্ত্বেও অনেক ভালো মানুষ সম্পদশালী না হওয়ায় মনোনয়ন পাচ্ছেন না।’

মনোনয়ন প্রদানে নারীদের উপেক্ষা সম্পর্কে তিনি বলেন, “দীর্ঘদিন ধরেই আমাদের রাজনৈতিক দলগুলো নারীর রাজনৈতিক ক্ষমতায়নের কথা বলে আসলেও বাস্তবে আমরা উল্টো চিত্রটি দেখতে পাই। প্রথম দু দফায় আওয়ামী লীগ মাত্র ১২ জন এবং বিএনপি মাত্র ৬ জনকে চেয়ারম্যান প্রার্থী করে।’ এবারের নির্বাচনে এ পর্যন্ত ১৪ জন নারীর চেয়ারম্যান পদে নির্বাচিত হওয়ার তথ্য পাওয়া গিয়েছে বলে জানান তিনি।

তিনি আরও বলেন, ‘প্রতিটি ধাপের নির্বাচনের পূর্বেই প্রতিপক্ষের এজেন্টদের ভয়ভীতি প্রদর্শন, ভোটকেন্দ্রে ঢুকতে না দেওয়া বা ভোটকেন্দ্র থেকে বের করে দেওয়া; বুথ দখল করে ব্যালট পেপারে সিল মেরে বাস্তবে ভরা; চেয়ারম্যান প্রার্থীর ব্যালটে প্রকাশ্যে ভোট দিতে বাধ্য করা; নির্বাচনী কর্মকর্তা কর্তৃক ব্যালট পেপারে সিল মারা বা সিল মারতে সহায়তা করা; ব্যালট বাস্তব ছিনিয়ে নেওয়ার চেষ্টা করা এবং সংখ্যালঘু সম্প্রদায়ের ওপর হামলা ইত্যাদি ঘটনা ঘটেছে। বিভিন্ন ধরনের অনিয়মের কারণে তিন ধাপে মোট ১৩৯টি কেন্দ্রের ভোট গ্রহণ স্থগিত করা হয়। কোনো কোনো ইউনিয়নে নির্বাচনের ফলাফল পাল্টে দেওয়ারও অভিযোগ উঠেছে।’

জনাব এম হাফিজউদ্দিন খান বলেন, ‘ইউনিয়ন পরিষদ নির্বাচনে ব্যাপক সহিংসতা ও অনিয়মের ঘটনা সংবাদ মাধ্যমে প্রকাশিত হয়েছে। এছাড়া চেয়ারম্যান পদে প্রায় ১৫০ জনের বিনা প্রতিদ্বন্দ্বিতায় নির্বাচিত হওয়ার ঘটনা ঘটেছে। এর মাধ্যমে খারাপ নির্বাচনের একটি ট্রেন্ড/নজির সৃষ্টি হচ্ছে। অথচ নির্বাচন হচ্ছে গণতন্ত্রের প্রথম ধাপ। তাই সুষ্ঠু নির্বাচন আয়োজন করা অতীব গুরুত্বপূর্ণ।’ মনোনয়ন বাণিজ্য রোধে দলীয় প্যানেল থেকে প্রার্থী মনোনয়ন দেয়া যেতে পারে বলে মন্তব্য করেন তিনি।

ড. বদিউল আলম মজুমদার বলেন, ‘আমরা বিকৃত ইউনিয়ন পরিষদ নির্বাচন লক্ষ করছি। নির্বাচনে সহিংসতা ও অনিয়মের পাশাপাশি বর্তমানে প্রকাশ্যে অস্ত্রের ব্যবহার হচ্ছে, যা গণতান্ত্রিক ব্যবস্থার জন্য অশনিশঙ্কিত।’ তিনি বলেন, ‘শুধু নির্বাচনের দিনকে বিবেচনায় নিয়ে নির্বাচন সুষ্ঠু হয়েছে বললে হবে না। বরং নির্বাচনের আগে-পরে কী ঘটছে, নির্বাচন প্রতিযোগিতামূলক হচ্ছে কিনা এবং সবাই প্রার্থী হতে পারছে কিনা ইত্যাদি বিভিন্ন বিষয় বিবেচনায় নিতে হবে।’

মুহাম্মদ জাহাঙ্গীর বলেন, ‘দলভিত্তিক ইউনিয়ন পরিষদ নির্বাচনের কারণে সহিংসতা ও অনিয়মের ঘটনা ঘটছে। তাই ভবিষ্যতে দলভিত্তিক নির্বাচন করা ঠিক হবে কিনা তা নিয়ে গণমাধ্যমে জোরালো আওয়াজ তোলা দরকার। কারণ আমাদের দলগুলো এখনও দলভিত্তিক নির্বাচনের জন্য উপযুক্ত হয়ে উঠেনি।’ তিনি বলেন, ‘শুধু আইন ও ক্ষমতা থাকলেই নির্বাচন কমিশনের পক্ষে সুষ্ঠু নির্বাচন করা সম্ভব নাও হতে পারে। কারণ কারা কমিশনে কমিশনার হিসেবে নিয়োগ পাচ্ছেন এবং নিয়োগপ্রাপ্তরা সদিচ্ছা ও সাহস নিয়ে কাজ করছেন কিনা সেটাই প্রধান বিবেচ্য বিষয়।’

২.১.৫ ‘ইউনিয়ন পরিষদ নির্বাচন ২০১৬: রক্ষকের রেকর্ড’ শীর্ষক সংবাদ সম্মেলন: ‘ব্যাপক সহিংসতাসহ বিভিন্ন ধরনের নির্বাচনী অনিয়মের কারণে বাংলাদেশের ইতিহাসে চলমান ইউনিয়ন পরিষদ নির্বাচন সবচেয়ে মন্দ ইউনিয়ন পরিষদ নির্বাচন’ বলে মন্তব্য করেছেন সুজন-সুশাসনের জন্য নাগরিক-এর নেতৃবৃন্দ। আজ ২৬ মে ২০১৬ সকাল ১১.০০টায়, ইঞ্জিনিয়ার্স ইনস্টিটিউশনে সুজন আয়োজিত ‘ইউনিয়ন পরিষদ নির্বাচন ২০১৬: রক্ষকের রেকর্ড’ শীর্ষক এক সংবাদ সম্মেলনে সুজন নেতৃবৃন্দ এ মন্তব্য করেন। নির্বাচনী তফসিল ঘোষণার পর থেকে এ পর্যন্ত নির্বাচনপূর্ব, নির্বাচনকালীন ও নির্বাচন পরবর্তী সংঘর্ষ এবং নির্বাচনকেন্দ্রিক বিরোধের জেরে ১০১ জনের প্রাণহানি ঘটেছে এবং আহতের সংখ্যা অন্তত আট হাজার ছাড়িয়েছে বলে সংবাদ সম্মেলনে জানানো হয়।

সংবাদ সম্মেলনে সুজন সম্পাদক ড. বদিউল আলম মজুমদার, সুজন সহ-সম্পাদক জনাব জাকির হোসেন, নির্বাহী কমিটির সদস্য জনাব সৈয়দ আবুল মকসুদ ও প্রকৌশলী মুসবাহ আলীম এবং সুজন কেন্দ্রীয় সমন্বয়কারী দিলীপ কুমার সরকার প্রমুখ উপস্থিত ছিলেন।

লিখিত বক্তব্যে দিলীপ কুমার সরকার বলেন, ঘোষিত তফসিল অনুযায়ী, ২২ মার্চ থেকে শুরু হয়ে এখনও চলমান রয়েছে ইউনিয়ন পরিষদ নির্বাচন ২০১৬। ইতোমধ্যেই চারটি ধাপের নির্বাচন সম্পন্ন হয়েছে। আগামী ২৮ মে ও ৪ জুন ২০১৬ তারিখে যথাক্রমে পঞ্চম ও ষষ্ঠ ধাপের ভোটপর্বের মধ্য দিয়ে এই নির্বাচনের পরিসমাপ্তি ঘটবে। সহিংসতাসহ বিভিন্ন ধরনের নির্বাচনী অনিয়ম ও নেতিবাচক অনুষ্ণের দৃশ্যমানতার কারণে বাংলাদেশের ইতিহাসে এটিকেই সবচেয়ে মন্দ ইউনিয়ন পরিষদ নির্বাচন বলে মনে করেন

অনেকে। কেননা ব্যাপক রক্তক্ষয় ও অনিয়মের দিক থেকে অতীতের সকল রেকর্ড অতিক্রম করেছে এই নির্বাচন। নির্বাচনী সহিংসতায় হতাহতের বিষয়টি এতই ব্যাপক যে, ইতোমধ্যেই তা সকল সচেতন মানুষের মধ্যে উদ্বেগের সৃষ্টি করেছে।’



নির্বাচনী সহিংসতায় প্রাণহানি সম্পর্কে তিনি বলেন, ‘অতীতের ইউনিয়ন পরিষদ নির্বাচনগুলোর প্রাণহানির তথ্য অনুসন্ধান করে দেখা যায় যে, ১৯৭৩, ১৯৭৭, ১৯৮৩ ও ১৯৯২-এ প্রাণহানির কোনো ঘটনা ঘটেনি। ১৯৮৮ সালে ৮০ জন, ১৯৯৭ সালে ৩১ জন, ২০০৩ সালে ২৩ জন এবং ২০১১ সালে ১০ জনের প্রাণহানি ঘটেছে বলে জানা

যায় (দৈনিক ইত্তেফাক, ৪ এপ্রিল ২০১৬)। অতীতের নির্বাচনগুলোর মধ্যে সবচেয়ে বেশি প্রাণহানির ঘটনা ঘটে ১৯৮৮ সালে। সবচেয়ে খারাপ নির্বাচনের তকমাও জুটেছিল ঐ নির্বাচনের নামের পাশে। প্রাণহানির ক্ষেত্রে অতীতের সকল রেকর্ড অতিক্রম করেছে এবারের ইউনিয়ন পরিষদ নির্বাচন এবং তা চলছে দীর্ঘমেয়াদিভাবে।’

দিলীপ কুমার সরকার বলেন, ‘আমরা মনে করি যে, প্রতিযোগিতার মনোভাব থেকে গ্রহণ না করে যে কোনো মূল্যেই জয়ী হওয়ার আকাঙ্ক্ষাই নির্বাচনী সহিংসতার বড় কারণ। আর নির্বাচনী আচরণবিধি ভঙ্গ করেও পার পাওয়া গেলে সহিংসতার মাত্রা বৃদ্ধি পাওয়াটাই স্বাভাবিক। উদাহরণ হিসেবে বলা যেতে পারে যে, নিহত সর্বমোট ১০১ জনের মধ্যে চেয়ারম্যান পদের নির্বাচন সংশ্লিষ্ট ঘটনা বা বিরোধেই প্রাণ গিয়েছে ৬৩ জনের। পাশাপাশি এই নির্বাচনে আচরণবিধি ভঙ্গের বিরুদ্ধে কখনই নির্বাচন কমিশনকে আমরা কঠোর অবস্থানে দেখিনি। এটাও সহিংসতায় বৃদ্ধির বড় কারণ।’

তিনি বলেন, ‘বিভাগভিত্তিক প্রাণহানির তথ্য বিশ্লেষণে দেখা যায় যে, ঢাকা বিভাগে ২২ জন, চট্টগ্রাম বিভাগে ১৯ জন, বরিশাল বিভাগে ১৬ জন, রাজশাহী বিভাগে ১৬ জন, খুলনা বিভাগে ১৩ জন, ময়মনসিংহ বিভাগে ৯ জন, রংপুর বিভাগে ৫ জন এবং সিলেট বিভাগে ১ জন প্রাণ হারিয়েছেন। দলগত পরিচয়ের দিক থেকে দেখা যায় যে, বাংলাদেশ আওয়ামী লীগের নেতা, কর্মী বা সমর্থক ৪০ জন, বাংলাদেশ আওয়ামী লীগের বিদ্রোহী প্রার্থীর কর্মী বা সমর্থক ১২ জন, বাংলাদেশ জাতীয়তাবাদী দলের ২ জন, জাতীয় পার্টি-জেপি’র ১ জন, জনসংহতি সমিতির ১ জন, স্বতন্ত্র প্রার্থীর কর্মী বা সমর্থক ২ জন, মেম্বার প্রার্থীর কর্মী বা সমর্থক ৩১ জন এবং ১২ জন সাধারণ মানুষ রয়েছেন প্রাণহানির তালিকায়। মৃতদের মধ্যে ৪ জন নারী ও ৩ জন শিশুসহ একজন সম্ভাব্য চেয়ারম্যান প্রার্থী ও ৩ জন মেম্বার প্রার্থীও রয়েছেন। চেয়ারম্যান প্রার্থীদের মধ্যে ৪২টি সংঘর্ষের ঘটনায় ৪৫ জন প্রাণ হারিয়েছেন। এ পর্যন্ত নিহত ১০১ জনের মধ্যে নির্বাচন-পূর্ব সংঘর্ষে ৪৫ জন, নির্বাচনকালীন সংঘর্ষে ৩৬ জন এবং নির্বাচনোত্তর সংঘর্ষে ২০ জনের মৃত্যু হয়েছে।’

বিনা প্রতিদ্বন্দ্বিতায় নির্বাচিত হওয়া সম্পর্কে দিলীপ কুমার সরকার বলেন, ‘চেয়ারম্যান পদে বিনা প্রতিদ্বন্দ্বিতায় নির্বাচিত হওয়ার অতীতের যে তথ্য পাওয়া যাচ্ছে, সে অনুযায়ী ১৯৮৮ সালে ১০০ জন, ১৯৯২ সালে ৪ জন, ১৯৯৭ সালে ৩৭ জন এবং ২০০৩ সালে ৩৪ জন বিনা প্রতিদ্বন্দ্বিতায় নির্বাচিত হয়েছেন। ২০১১ সালের ইউনিয়ন পরিষদ নির্বাচনের এ সংক্রান্ত কোনো তথ্য পাওয়া যায়নি। এক্ষেত্রেও ১০০ জন বিনা প্রতিদ্বন্দ্বিতায় নির্বাচিতদের নিয়ে ১৯৮৮ সাল ছিল এগিয়ে। তবে অতীতের সকল রেকর্ড স্নান হয়ে গিয়েছে এবারের নির্বাচনে বিনা প্রতিদ্বন্দ্বিতায় নির্বাচিতদের সংখ্যার কাছে। নবম ইউনিয়ন পরিষদ নির্বাচনে এই সংখ্যা ২১১। প্রথম ধাপে ৫৪ জন, দ্বিতীয় ধাপে ৩৪ জন, তৃতীয় ধাপে ২৯ জন, চতুর্থ ধাপে ৩৪ জন, পঞ্চম ধাপে ৪২ জন এবং ষষ্ঠ ধাপে এ পর্যন্ত ১৮ জন চেয়ারম্যান প্রার্থী বিনা প্রতিদ্বন্দ্বিতায় নির্বাচিত হয়েছেন বলে জানা গিয়েছে। এরা সকলেই ক্ষমতাসীন বাংলাদেশ আওয়ামী লীগের প্রার্থী।’

নির্বাচনে মনোনয়ন বাণিজ্য সম্পর্কে তিনি বলেন, দলভিত্তিক স্থানীয় সরকার নির্বাচন ব্যবস্থার ফলে নির্বাচনী আইনানুযায়ী এখন চেয়ারম্যান পদে মনোনয়নের বাধ্যবাধকতা সৃষ্টি হয়েছে। আর এই মনোনয়ন দিতে গিয়েই ঘটছে বাণিজ্যের ঘটনা। ইউনিয়ন পরিষদ নির্বাচনে রাজনৈতিক দলসমূহের মনোনয়ন বাণিজ্যের প্রবণতা এমনভাবে ছড়িয়ে পড়ছে যে, প্রতিদিনই তা গণমাধ্যমে ফলাও করে প্রকাশিত ও প্রচারিত হচ্ছে। মনোনয়ন বাণিজ্যের ঘটনা আওয়ামী লীগ ও বিএনপি উভয় দলে ঘটার অভিযোগ পাওয়া গেলেও, আওয়ামী লীগে এর ব্যাপকতা বেশি।’

মনোনয়ন প্রদানে নারীদের উপেক্ষা সম্পর্কে তিনি বলেন, “দীর্ঘদিন ধরেই আমাদের রাজনৈতিক দলগুলো নারীর রাজনৈতিক ক্ষমতায়নের কথা বলে আসলেও বাস্তবে আমরা উল্টো চিত্রটি দেখতে পাই। এ পর্যন্ত চার ধাপে ১৭ জন নারী নির্বাচিত হয়েছেন বলে জানা গিয়েছে। প্রথম ধাপে ৮ জন, দ্বিতীয় ধাপে ৪ জন, তৃতীয় ধাপে ২জন এবং চতুর্থ ধাপে ৩ জন নারী নির্বাচিত হয়েছেন।”

তিনি আরও বলেন, ‘প্রতিটি ধাপের নির্বাচনের পূর্বেই প্রতিপক্ষের এজেন্টদের ভয়ভীতি প্রদর্শন, ভোটকেন্দ্রে ঢুকতে না দেওয়া বা ভোটকেন্দ্রে থেকে বের করে দেওয়া; বুথ দখল করে ব্যালট পেপারে সিল মেরে বাস্তবে ভরা; চেয়ারম্যান প্রার্থীর ব্যালটে প্রকাশ্যে ভোট দিতে বাধ্য করা; নির্বাচনী কর্মকর্তা কর্তৃক ব্যালট পেপারে সিল মারা বা সিল মারতে সহায়তা করা; ব্যালট বাস্তব ছিনিয়ে নেওয়ার চেষ্টা করা এবং সংখ্যালঘু সম্প্রদায়ের ওপর হামলা ইত্যাদি ঘটনা ঘটেছে। কোনো কোনো এলাকায় ভোট প্রদানে এমন অস্বাভাবিকতা ছিল যে, ভোট প্রদানের তালিকায় মৃত ব্যক্তি ও প্রবাসীরাও ছিলেন। কোথাও কোথাও ভোট পড়ার হার ছিল ১০০ শতাংশেরও অধিক। কোনো কোনো ইউনিয়নে নির্বাচনের ফলাফল পাল্টে দেওয়ারও অভিযোগ উঠেছে।’

ড. বদিউল আলম মজুমদার বলেন, ‘চলমান ইউপি নির্বাচন নির্বাচনও নয় এবং গণতন্ত্রও নয়। বরং এক দুঃস্বপ্ন। নির্বাচনে অনিয়ম, মনোনয়ন বাণিজ্য, বিনা প্রতিদ্বন্দ্বিতায় নির্বাচনের সংখ্যা প্রভৃতি বিবেচনায় এ নির্বাচন যেন সকলের কাছে গা সওয়া হয়ে গিয়েছে। তারমানে এগুলো এখন সবার কাছে গ্রহণযোগ্য হয়ে যাচ্ছে, যা ভবিষ্যত গণতন্ত্রের জন্য কাজিফত নয়।’ তিনি আরও বলেন যে, ‘যারা চোখে দেখে না বা কানে শুনে না তারা ছাড়া সকলেই বলবেন যে, এ পর্যন্ত অনুষ্ঠিত নির্বাচনসমূহ কোনোক্রমেই সুষ্ঠু ও গ্রহণযোগ্য ছিলো না।’

সৈয়দ আবুল মকসুদ বলেন, ‘এবারের নির্বাচনে মনোনয়ন বাণিজ্য এতটাই প্রকট ছিলো যা অনেকটা রোযার আগে ছোলা কেনা-বেচার মত করে বেচা-কেনা হয়েছে। নিবাচনে অনিয়ম কোন পর্যায়ে পৌঁছেছে যে, কোথাও কোথাও মৃত ব্যক্তিরও ভোট দিয়েছেন।’ তিনি আরও বলেন, ‘নির্বাচনে নিহতরা আসলে নিহত নন, তারা শহীদ হয়েছেন। তাই এ নির্বাচনকে একটি শহীদী নির্বাচন বলে আখ্যা দেয়া দেয়া যায়। এই নির্বাচন কমিশন অন্তত আর কিছু করতে পারুক বা না পারুক যারা মারা গিয়েছেন তাদের রুহের মাগফিরাত কামনা করতে পারেন। যদিও এতগুলো মানুষ মারা যাওয়া কোনো খেলা কিংবা তামাশার বিষয় নয়।’

২.১.৬. ‘ইউনিয়ন পরিষদ নির্বাচন ২০১৬: একটি সার্বিক মূল্যায়ন’ শীর্ষক সংবাদ সম্মেলন: ‘ব্যাপক সহিংসতাসহ বিভিন্ন ধরনের নির্বাচনী অনিয়মের কারণে বাংলাদেশের ইতিহাসে চলমান ইউনিয়ন পরিষদ নির্বাচন সবচেয়ে মন্দ ইউনিয়ন পরিষদ নির্বাচন’ বলে মন্তব্য করেছেন সুজন-সুশাসনের জন্য নাগরিক-এর নেতৃবৃন্দ। আজ ১৬ জুন ২০১৬ সকাল ১১.০০টায়, রিপোর্টার্স ইউনিটিতে সুজন আয়োজিত ‘ইউনিয়ন পরিষদ নির্বাচন ২০১৬: একটি সার্বিক মূল্যায়ন’ শীর্ষক এক সংবাদ সম্মেলনে সুজন নেতৃবৃন্দ এ মন্তব্য করেন। নির্বাচনী তফসিল ঘোষণার পর থেকে এ পর্যন্ত নির্বাচনপূর্ব, নির্বাচনকালীন ও নির্বাচন পরবর্তী সংঘর্ষ এবং নির্বাচনকেন্দ্রিক বিরোধের জেরে ১৪৫ জনের প্রাণহানি ঘটেছে এবং আহতের সংখ্যা অন্তত এগারো হাজার ছাড়িয়েছে বলে সংবাদ সম্মেলনে জানানো হয়।



সংবাদ সম্মেলনে সুজন সভাপতি এম হাফিজউদ্দিন খান, নির্বাহী কমিটির সদস্য জনাব সৈয়দ আবুল মকসুদ ও প্রকৌশলী মুসবাহ আলীম, জাতীয় কমিটির সদস্য মুহাম্মদ জাহাঙ্গীর এবং সুজন কেন্দ্রীয় সমন্বয়কারী দিলীপ কুমার সরকার প্রমুখ উপস্থিত ছিলেন।

লিখিত বক্তব্যে দিলীপ কুমার সরকার বলেন, ‘এবারের ইউনিয়ন পরিষদ নির্বাচনের বিশেষত্ব ছিল, এই প্রথমবার রাজনৈতিক দলভিত্তিকভাবে এবং দলীয় প্রতীকে এই নির্বাচন অনুষ্ঠিত

হয়েছে। আমরা সুজন-এর পক্ষ থেকে অনেক আগে থেকেই দলভিত্তিক স্থানীয় সরকার নির্বাচনের বিরোধিতা করে আসলেও, এর সপক্ষে আইন প্রণীত হয় এবং উক্ত আইনের ভিত্তিতে নির্বাচন অনুষ্ঠিত হয়। আমরা মনে করি, ব্যাপক সহিংসতা ও অনিয়মের মধ্য দিয়ে এবারে যে মন্দ নির্বাচনের দৃষ্টান্ত সৃষ্টি হলো, এর প্রধান কারণ দলভিত্তিক নির্বাচন। উল্লেখ্য, অতীতে রাজনৈতিক দলগুলো স্থানীয় সরকার নির্বাচনকে দলীয় অবয়ব দেওয়ার চেষ্টা করলেও একই দল থেকে একাধিক প্রার্থী অংশ নেওয়ায় নির্বাচনগুলো বিশেষ করে ইউনিয়ন পরিষদ নির্বাচন কখনই পুরোপুরি রাজনৈতিক পরিচিতি পায়নি।’

নির্বাচনী সহিংসতায় প্রাণহানি সম্পর্কে তিনি বলেন, ‘ইউনিয়ন পরিষদ নির্বাচনে প্রাণহানির তথ্য অনুসন্ধান করে দেখা যায় যে, ১৯৭৩, ১৯৭৭, ১৯৮৩ ও ১৯৯২-এ প্রাণহানির কোনো ঘটনা ঘটেনি। ১৯৮৮ সালে ৮০ জন, ১৯৯৭ সালে ৩১ জন, ২০০৩ সালে

২৩ জন এবং ২০১১ সালে ১০ জনের প্রাণহানি ঘটেছে বলে জানা যায়। ইতোপূর্বে অধিক প্রাণহানির ঘটনা ঘটে ১৯৮৮ সালে। ঐ নির্বাচনটিকেই সবচেয়ে মন্দ ইউনিয়ন পরিষদ নির্বাচন বলে আখ্যায়িত করা হতো।

প্রাণহানির ক্ষেত্রে নতুন রেকর্ড সৃষ্টি হলো এবারের ইউনিয়ন পরিষদ নির্বাচনে। গণমাধ্যমে প্রকাশিত তথ্যের ভিত্তিতে প্রণীত তালিকা অনুযায়ী, এবার নির্বাচনী তফসিল ঘোষণার পর থেকে এ পর্যন্ত নির্বাচনপূর্ব, নির্বাচনকালীন ও নির্বাচন পরবর্তী সংঘর্ষ এবং নির্বাচনকেন্দ্রিক বিরোধের জেরে ১৪৫ জনের প্রাণহানি ঘটেছে।

বিভাগভিত্তিক প্রাণহানির তথ্য বিশ্লেষণে দেখা যায় যে, চট্টগ্রাম বিভাগে ৩২ জন, ঢাকা বিভাগে ২৯ জন, রাজশাহী বিভাগে ২০, বরিশাল বিভাগে ১৭ জন, জন, খুলনা বিভাগে ১৭ জন, ময়মনসিংহ বিভাগে ১৬ জন, রংপুর বিভাগে ৯ জন এবং সিলেট বিভাগে ৫ জন প্রাণ হারিয়েছেন। জেলাভিত্তিক তথ্য বিশ্লেষণে দেখা যায় যে, ৬৪টি জেলার সবগুলোতেই সংঘর্ষের ঘটনা ঘটলেই প্রাণহানি ঘটেছে ৪৬টিতে।

নির্বাচনী সহিংসতায় প্রাণহানির পাশাপাশি ব্যাপক সংখ্যক মানুষ আহতও হয়েছেন। গণমাধ্যমে প্রকাশিত তথ্য অনুযায়ী, নির্বাচনী তফসিল ঘোষণার পর থেকে এ পর্যন্ত সাড়ে এগারো হাজারেরও অধিক মানুষ আহত হয়েছে।”

বিনা প্রতিদ্বন্দ্বিতায় নির্বাচিত হওয়া সম্পর্কে দিলীপ কুমার সরকার বলেন, “অতীতে কোনো নির্বাচনে বিনাপ্রতিদ্বন্দ্বিতায় নির্বাচিত হওয়ার বিষয়টিকে আমরা দেখেছি ব্যতিক্রমী ঘটনা হিসেবে। নির্বাচনী আইনানুযায়ী এটা দোষের না। তবে অতীতের সকল রেকর্ড স্কান হয়ে গিয়েছে এবারের নির্বাচনে বিনা প্রতিদ্বন্দ্বিতায় নির্বাচিতদের সংখ্যার কাছে। নবম ইউনিয়ন পরিষদ নির্বাচনে এই সংখ্যা ২১৪। প্রথম ধাপে ৫৪ জন, দ্বিতীয় ধাপে ৩৪ জন, তৃতীয় ধাপে ২৯ জন, চতুর্থ ধাপে ৩৫ জন, পঞ্চম ধাপে ৩৯ জন এবং ষষ্ঠ ধাপে ২৪ জন চেয়ারম্যান প্রার্থী বিনা প্রতিদ্বন্দ্বিতায় নির্বাচিত হয়েছেন। এদের মধ্যে মাত্র ২ জন স্বতন্ত্র এবং অবশিষ্ট ১১২ জনই ক্ষমতাসীন বাংলাদেশ আওয়ামী লীগ থেকে নির্বাচিত।”

নির্বাচনে মনোনয়ন বাণিজ্য সম্পর্কে তিনি বলেন, দলভিত্তিক স্থানীয় সরকার নির্বাচন ব্যবস্থার ফলে নির্বাচনী আইনানুযায়ী এখন চেয়ারম্যান পদে মনোনয়নের বাধ্যবাধকতা সৃষ্টি হয়েছে। আর এই মনোনয়ন দিতে গিয়েই ঘটছে বাণিজ্যের ঘটনা। ইউনিয়ন পরিষদ নির্বাচনে রাজনৈতিক দলসমূহের মনোনয়ন বাণিজ্যের প্রবণতা এমনভাবে ছড়িয়ে পড়ছে যে, প্রতিদিনই তা গণমাধ্যমে ফলাও করে প্রকাশিত ও প্রচারিত হচ্ছে। মনোনয়ন বাণিজ্যের ঘটনা আওয়ামী লীগ ও বিএনপি উভয় দলে ঘটার অভিযোগ পাওয়া গেলেও, আওয়ামী লীগে এর ব্যাপকতা বেশি।’

নির্বাচনী ফলাফল সম্পর্কে তিনি বলেন, “ব্যাপক সহিংসতা ও অনিয়মসহ বিভিন্ন কারণে এবারের ইউনিয়ন পরিষদ নির্বাচন প্রতিযোগিতামূলক হয়নি। তাই, ফলাফল হয়েছে একপেশে। গণমাধ্যমে প্রকাশিত নির্বাচন কমিশন সূত্রের তথ্য অনুযায়ী মোট ৬ ধাপে নির্বাচন হয়েছে ৪১০৪ টি। ফলাফল ঘোষিত হয়েছে ৪০০০টি ইউনিয়নের। স্থগিত আছে ১০৪টি ইউনিয়নের ফলাফল। ফলাফল পর্যালোচনা করে দেখা যায় যে, বাংলাদেশ আওয়ামী লীগ ২৬৬৭টি (৬৬.৬৭%), বাংলাদেশ জাতীয়তাবাদী দল ৩৬৭টি (৯.১৭%), জাতীয় পার্টি-জাপা ৫৭টি (১.৪২%), জাতীয় সমাজতান্ত্রিক দল-জাসদ ৮টি (০.২০%), জাতীয় পার্টি-জেপি ৫টি (০.১২%), বাংলাদেশের ওয়ার্কার্স পার্টি ৩টি (০.১২%), ইসলামী আন্দোলন বাংলাদেশ ৩টি (০.০৭%), জমিয়তে উলামায়ে ইসলাম বাংলাদেশ ১টি (০.০২%), জাকের পার্টি ১টি (০.০২%) এবং স্বতন্ত্র প্রার্থীরা ৮৮৮টি (২২.২%) ইউনিয়নে জয়ী হয়েছে।”

মনোনয়ন প্রদানে নারীদের উপেক্ষা সম্পর্কে তিনি বলেন, “দীর্ঘদিন ধরেই আমাদের রাজনৈতিক দলগুলো নারীর রাজনৈতিক ক্ষমতায়নের কথা বলে আসলেও বাস্তবে আমরা উল্টো চিত্রটি দেখতে পাই। এ নির্বাচনে ২৯ জন নারী নির্বাচিত হয়েছেন বলে জানা গিয়েছে। প্রথম ধাপে ৮জন, দ্বিতীয় ধাপে ৪জন, তৃতীয় ধাপে ২জন, চতুর্থ ধাপে ৩জন, পঞ্চম ধাপে ৭জন ও ষষ্ঠ ধাপে ৫জন নারী নির্বাচিত হয়েছেন। নির্বাচিত ২৯জনের মধ্যে ২৪জন বাংলাদেশ আওয়ামী লীগ এবং ১জন জাতীয় পার্টির মনোনীত প্রার্থী ছিলেন। এছাড়া ৪জন ছিলেন স্বতন্ত্র প্রার্থী। আওয়ামী লীগ থেকে নির্বাচিত ২৪ জনের মধ্যে ৬ জনই বিনা প্রতিদ্বন্দ্বিতায় নির্বাচিত হয়েছেন।”

তিনি আরও বলেন, “দলভিত্তিক স্থানীয় সরকার নির্বাচন ও কার্যকর স্থানীয় সরকারের বিষয়টি এক করে ভাবলে আমাদের সামনে দুটি অবশ্য করণীয় রয়েছে। তা হচ্ছে, এক. স্থানীয় সরকার ব্যবস্থাকে শক্তিশালীকরণ, দুই. ব্যাপক সংস্কারের মধ্য দিয়ে রাজনীতিতে সুস্থতা ফিরিয়ে আনা। স্থানীয় সরকার ব্যবস্থাকে শক্তিশালীকরণের ক্ষেত্রে প্রয়োজন একটি বলিষ্ঠ বিকেন্দ্রীকরণ কর্মসূচির মাধ্যমে আরও ক্ষমতা, দায়িত্ব ও সম্পদ দিয়ে স্থানীয় সরকার প্রতিষ্ঠানসমূহকে প্রকৃত অর্থেই শক্তিশালী করা। এক্ষেত্রে জাতীয় বাজেটের একটা উল্লেখযোগ্য অংশ স্থানীয় সরকার প্রতিষ্ঠানসমূহের নামে বরাদ্দ এবং জনসংখ্যার ভিত্তিতে বন্টন; জনঅংশগ্রহণমূলক প্রক্রিয়ায় স্থানীয় চাহিদার ভিত্তিতে উন্নয়ন পরিকল্পনা প্রণয়নের বাধ্যবাধকতা সৃষ্টি, প্রতিষ্ঠানসমূহের প্রকৃত চাহিদার ভিত্তিতে জনবল বৃদ্ধি; জনপ্রতিনিধিদের ভাতা যৌক্তিকতার নিরিখে সম্মানজনক পর্যায়ে উন্নীত করা; সংসদীয় রীতিতে প্রথমে সকলকে সদস্য হিসেবে নির্বাচিত করে পরে তাঁদের ভেতর থেকে গণতান্ত্রিক পদ্ধতিতে মেয়র, চেয়ারম্যান বা ভাইস চেয়ারম্যান নির্বাচিত করা; নারীদের জন্য

ঘূর্ণায়মান পদ্ধতির আসন সংরক্ষণের ব্যবস্থা করা; স্থানীয় সরকার কমিশন গঠন করা; স্থানীয় সরকার প্রতিষ্ঠানসমূহকে সংসদ সদস্যদের প্রভাবমুক্ত করা; জনপ্রতিনিধিদের বিরুদ্ধে দায়েরকৃত কোনো মামলায় অভিযোগ গঠনের সাথে সাথেই সদস্যপদ বাতিলের বিধান বাতিল করা ইত্যাদি উদ্যোগ গ্রহণ করা প্রয়োজন। এছাড়াও স্থানীয় সরকার প্রতিষ্ঠানসমূহকে আইনানুযায়ী পদ্ধতিগতভাবে পরিচালনার উদ্যোগ গ্রহণ করা উচিত। এক্ষেত্রে ওয়ার্ড সভা, উন্মুক্ত বাজেট অধিবেশন, নিয়মানুযায়ী কর নির্ধারণ ও নিয়মিত কর আদায়, স্থায়ী কমিটি গঠন ও সক্রিয়করণ, হস্তান্তরিত বিভাগসমূহকে সংশ্লিষ্ট সকল স্থানীয় সরকার প্রতিষ্ঠানের কাছে হস্তান্তর ইত্যাদি বিষয়সমূহকে আইনানুযায়ী বাস্তবায়নের উদ্যোগ গ্রহণ করতে হবে।”

এম হাফিজউদ্দিন খান বলেন, “ইউপি নির্বাচনের মাধ্যমে নির্বাচনের যে ধারা বা ট্রেড প্রতিষ্ঠিত হয়েছে তা নিয়ে আমরা সকলেই উদ্বিগ্ন। সহিংসতা, হানাহানি, ধাওয়া-পাল্টা ধাওয়া, বিরোধী দলের নেতা-কর্মীদের ওপর নির্যাতন ও হয়রানি, পুলিশের উপস্থিতিতে ভোট কারচুপি প্রভৃতি আমরা এবারের নির্বাচনে ব্যাপক আকারে দেখতে পেয়েছি। নির্বাচনের সময় সরকারের সকল প্রতিষ্ঠানই নির্বাচন কমিশনকে সহযোগিতা করতে বাধ্য। কিন্তু আমাদের নির্বাচন কমিশন বলেছে যে, তারা সরকারের ও আইন-শৃঙ্খলা বাহিনীর সহযোগিতা পায়নি, যা অত্যন্ত দুঃজনক।”

সৈয়দ আবুল মকসুদ বলেন, “আমাদের দেশে গত দেড়শ বছন যাবৎ ইউপি নির্বাচন হচ্ছে। এখান থেকেই গণতন্ত্রের সূচনা। কিন্তু এবারের নির্বাচনে সবচেয়ে বেশি প্রাণহানি ঘটেছে এবং সবচেয়ে মন্দ নির্বাচন হিসেবে আখ্যায়িত হয়েছে।” তিনি বর্তমান নির্বাচনকে ভৌতিক গণতান্ত্রিক নির্বাচন বলে মন্তব্য করেন। ভৌতিক এ কারণে যে, ভোটাররা ভয়ে নির্বাচনে ভোট দিতে যেতে পারেননি। গণতান্ত্রিক নির্বাচন এ অর্থে যে, বহুদল অংশগ্রহণ করেছে এবং জীবিত অনেক ব্যক্তি ভোট দিতে পারেননি, কিন্তু মৃত ব্যক্তিরও ভোট দিয়েছেন। তাই এ নির্বাচন একটি ভৌতিক গণতান্ত্রিক নির্বাচন।”

ইউপি নির্বাচনে দেশজুড়ে সহিংসতার সঠিক চিত্র তুলে ধরার জন্য গণমাধ্যমের কর্মীদের ধন্যবাদ জানিয়ে মুহাম্মদ জাহাঙ্গীর বলেন, ‘নির্বাচনের যে মডেল বর্তমান সরকার ও নির্বাচন কমিশন প্রতিষ্ঠা করেছে তাতে ২০১৯ সালের নির্বাচনেও যে ক্ষমতাসীনরাই পুনরায় ক্ষমতায় অধিষ্ঠিত হয়ে যাবে, যা গণতন্ত্র চর্চার ক্ষেত্রে মঙ্গল বয়ে আনবে না।’ এ পেক্ষাপটে তিনি একটি জাতীয় ভিত্তিতে একটি সংলাপ হওয়া প্রয়োজন বলে মন্তব্য করেন। নির্বাচনের পর এখন নির্বাচন কমিশন পুনর্গঠন, স্থানীয় সরকার ব্যবস্থার সংস্কার তথা স্থানীয় সরকার ব্যবস্থাকে শক্তিশালী করা দরকার বলেও মন্তব্য করেন তিনি।

২.২.১. জনগণের মুখোমুখি অনুষ্ঠান: ইউনিয়ন পরিষদ নির্বাচনকে সামনে রেখে মূলত তিন ধরনের উদ্দেশ্যকে সামনে রেখে সূজন-এর উদ্যোগে জনগণের মুখোমুখি অনুষ্ঠানের আয়োজন করা হয়। উদ্দেশ্য সমূহ ছিল, এক: অবাধ, নিরপেক্ষ ও অর্থবহ নির্বাচনের পরিবেশ সৃষ্টি; দুই: প্রার্থী, দল ও সমর্থকদের মধ্যে মরিয়্যা হয়ে জয়ের প্রচেষ্টার পরিবর্তে নির্বাচনকে প্রতিযোগিতার মনোভাব সৃষ্টি এবং তিন: সংযোগ্য ও জনকল্যাণে নিবেদিত প্রার্থী বাছাইয়ে ভোটারদের সহায়তা করা। এই তিনটি উদ্দেশ্যকে সামনে রেখে ইউনিয়নভিত্তিকভাবে প্রার্থীদের এক মঞ্চে এনে ‘জনগণের মুখোমুখি’ করা।

জনগণের মুখোমুখি অনুষ্ঠানে প্রার্থীগণ যেমন তাঁদের বক্তব্যে প্রত্যাশা, পরিকল্পনা ও প্রতিশ্রুতি তুলে ধরেছেন, অপরদিকে ভোটাররাও বিভিন্ন প্রশ্ন করে উত্তর জেনে নেওয়ার সুযোগ পেয়েছেন। অনুষ্ঠানে জনস্বার্থকে বিবেচনায় রেখে ‘সূজন’ কর্তৃক প্রণীত অঙ্গীকারনামা পাঠ করে শোনানো হয় এবং একমত পোষণ সাপেক্ষে অঙ্গীকারনামায় চেয়ারম্যান প্রার্থীদের স্বাক্ষর নেওয়া হয়। অঙ্গীকারসমূহের প্রতি সংহতি প্রকাশ করে প্রতিদ্বন্দ্বী প্রার্থীগণের পরস্পরের হাত ধরে শপথ বাক্য উচ্চারণ ছিল অনুষ্ঠানের অন্যতম আকর্ষণ। শুধুমাত্র প্রার্থীরাই নয় অনুষ্ঠানের আর একটি আকর্ষণ ছিল ভোটারদের শপথ। উল্লেখ্য, চেয়ারম্যান প্রার্থীদের অঙ্গীকারনামা ও ভোটারদের শপথনামা, অনুষ্ঠানসূচি ও অনুষ্ঠানের নিয়ম-কানুন সংযোজনী হিসেবে সংযোজিত হলো।

এবারের ইউনিয়ন পরিষদ নির্বাচনে সারাদেশের সর্বমোট সর্বমোট ৮৭টি ইউনিয়নে এই কার্যক্রম পরিচালিত হয়। ইউনিয়নসমূহের নাম নিম্ন প্রদত্ত হলো:



রাজশাহী বিভাগ: রাজশাহী বিভাগে সর্বমোট ২৪টি ইউনিয়নে জনগণের মুখোমুখি অনুষ্ঠানের আয়োজন করা হয়। ইউনিয়নসমূহ হচ্ছে- নওগাঁ জেলাধীন পত্নীতলা উপজেলার পত্নীতলা, নিরমইল, দিবর, আকবরপুর, মাটিন্দর, কৃষ্ণপুর, পাঁচিচড়া, নজিপুর, আমাইর ও শিহারা; ধামুইরহাট উপজেলায় আধানগর ও ধামুইরহাট; শাপাহার উপজেলার শাপাহার ও আইহাই; রাণীনগর উপজেলার কাটাসুর, মীরাট ও কালীগ্রাম; মহাদেবপুর উপজেলার মহাদেবপুর, চন্দনাইশ ও বাসুমইল; নওগাঁ সদর

উপজেলার ধুবলহাটি; রাজশাহী জেলাধীন চারঘাট উপজেলার সরদহ ও ভায়ালক্ষীপুর এবং মোহনপুর উপজেলার মৌগাছি ইউনিয়ন।



আলমবিদিতর, নোহালী, বড়বিল, গজঘন্টা, গংগাচড়া, মর্নোয়া, লক্ষীটারী উপজেলার রাজাহার ইউনিয়ন।

রংপুর বিভাগ: রংপুর বিভাগে সর্বমোট ১৭টি ইউনিয়নে জনগণের মুখোমুখি অনুষ্ঠানের আয়োজন করা হয়। ইউনিয়নসমূহ হচ্ছে- দিনাজপুর জেলাধীন কাহারোল উপজেলার মুকুন্দপুর ও রসুলপুর; খানসামা উপজেলার আলোকবাড়ি, আংগারপাড়া ও গোয়ালদীঘি; বিরল উপজেলার ধামইর; চিরিরবন্দর উপজেলার সাতনালা; রংপুর জেলাধীন পীরগাছা উপজেলার কল্যাণী; গংগাচড়া উপজেলার ও বেতগাড়ী এবং গাইবান্ধা জেলাধীন গোবিন্দগঞ্জ



বাকাল, বাগদা, রিটনীপুর ও গৈলা।

বরিশাল বিভাগ: বরিশাল বিভাগে সর্বমোট ১৫টি ইউনিয়নে জনগণের মুখোমুখি অনুষ্ঠানের আয়োজন করা হয়। ইউনিয়নসমূহ হচ্ছে- বালকাঠি জেলাধীন বালকাঠি সদর উপজেলার কেওড়া ও কীর্তিপাশা এবং বরিশাল জেলাধীন বরিশাল সদর উপজেলার চরকাউয়া ও চরবাড়িয়া; বাবুগঞ্জ উপজেলার কোবাই, রহমতপুর, মাধবপাশা, চাঁদপাশা, কেদারপুর, জাহাঙ্গীরনগর এবং আঁগৈলবাড়া উপজেলার রাজিহার,



জাফরাবাদ, কাইদরজঙ্গল, নোয়াবাদ ও দেহুন্দা ইউনিয়ন।

ময়মনসিংহ বিভাগ: ময়মনসিংহ বিভাগে সর্বমোট ১৩টি ইউনিয়নে জনগণের মুখোমুখি অনুষ্ঠানের আয়োজন করা হয়। ইউনিয়নসমূহ হচ্ছে- টাঙ্গাইল জেলাধীন ভূয়াপুর উপজেলার আলোয়া, গোবিন্দাসী, ফলদা ও নিকরাইল এবং গোপালপুর উপজেলাধীন আলমনগর; ময়মনসিংহ জেলাধীন ময়মনসিংহ সদর উপজেলার কুষ্টিয়া ও মুক্তাগাছা উপজেলার ঘোঁগা; নেত্রকোণা জেলাধীন নেত্রকোনা সদর উপজেলার সিংহের বাংলা ও চল্লিশা ইউনিয়ন এবং কিশোরগঞ্জ জেলাধীন করিমগঞ্জ উপজেলার



জেলাধীন ডুমুরিয়া উপজেলার রঘুনাথপুর ইউনিয়ন। অনুষ্ঠানটিতে সুজেন-এর স্থানীয় নেতৃবৃন্দ ছাড়াও আঞ্চলিক সমন্বয়কারী জনাব খোরশেদ আলম উপস্থিত ছিলেন।

খুলনা বিভাগ: খুলনা বিভাগে সর্বমোট ৯টি ইউনিয়নে জনগণের মুখোমুখি অনুষ্ঠানের আয়োজন করা হয়। ইউনিয়নসমূহ হচ্ছে- মেহেরপুর জেলাধীন গাংনী উপজেলার ধানখোলা, কাজিপুর, সাহারবাটি, মটমুড়া ও ষোলটাকা; যশোর জেলাধীন অভয়নগর উপজেলার প্রেমবাগ ও মনিরামপুর উপজেলার নেহালপুর; সাতক্ষীরা জেলাধীন কালিগঞ্জ উপজেলার মৌতলা এবং খুলনা



সিলেট বিভাগ: সিলেট বিভাগে সর্বমোট ৪টি ইউনিয়নে জনগণের মুখোমুখি অনুষ্ঠানের আয়োজন করা হয়। ইউনিয়নসমূহ হচ্ছে- মৌলভীবাজার জেলাধীন শ্রীমঙ্গল উপজেলার কালাপুর; সুনামগঞ্জ জেলাধীন দক্ষিণ সুনামগঞ্জ উপজেলার পূর্বপাগলা; দিরাই উপজেলার তাড়ল এবং হবিগঞ্জ জেলাধীন হবিগঞ্জ সদর উপজেলার গোপায়া ইউনিয়ন। অনুষ্ঠানটিতে সূজন-এর স্থানীয় নেতৃবৃন্দ ছাড়াও আঞ্চলিক সমন্বয়কারী জনাব তুহীন আলম উপস্থিত ছিলেন।



ঢাকা বিভাগ: ঢাকা বিভাগে সর্বমোট ৩টি ইউনিয়নে জনগণের মুখোমুখি অনুষ্ঠানের আয়োজন করা হয়। ইউনিয়নসমূহ হচ্ছে- মুন্সীগঞ্জ জেলাধীন শ্রীনগর উপজেলার হাসাড়া; রাজবাড়ী জেলাধীন কালুখালী উপজেলার মৃগী ইউনিয়ন এবং মাদারীপুর জেলাধীন মাদারীপুর সদর উপেলার রাসটি। অনুষ্ঠানটিতে সূজন-এর স্থানীয় নেতৃবৃন্দ ছাড়াও কেন্দ্রীয় সমন্বয়কারী দিলীপ কুমার সরকার, আঞ্চলিক সমন্বয়কারী জনাব মুর্শিকুল ইসলাম শিমুল ও এলাকা সমন্বয়কারী জিসান আলমগীর

উপস্থিত ছিলেন।



চট্টগ্রাম বিভাগ: চট্টগ্রাম বিভাগে সর্বমোট ২টি ইউনিয়নে জনগণের মুখোমুখি অনুষ্ঠানের আয়োজন করা হয়। ইউনিয়নসমূহ হচ্ছে- কক্সবাজার জেলাধীন চকরিয়া উপজেলার কোনাখালী এবং কুমিল্লা জেলাধীন লাকসাম উপজেলার আজগরা ইউনিয়ন। অনুষ্ঠানটিতে সূজন-এর স্থানীয় নেতৃবৃন্দ ছাড়াও কেন্দ্রীয় সমন্বয়কারী দিলীপ কুমার সরকার ও আঞ্চলিক সমন্বয়কারী জনাব জিল্লুর রহমান উপস্থিত ছিলেন।

৩. অন্যান্য: উপরোক্ত কার্যক্রম ছাড়াও সূজন-এর সভাপতি জনাব এম হাফিজউদ্দিন খান, সম্পাদক ড. বদিউল আলম মজুমদার, নির্বাহী সদস্য ড. তোফায়েল আহমেদ ও সৈয়দ আবুল মকসুদ, কেন্দ্রীয় সমন্বয়কারী দিলীপ কুমার সরকার বিভিন্ন টেলিভিশন টক শো এবং পত্র পত্রিকায় নিবন্ধ প্রকাশের মধ্য দিয়ে সূষ্ঠা নির্বাচনের সপক্ষে সাংগঠনিক বক্তব্য তুলে ধরেন। সিলেট জেলা কমিটির সভাপতি ও কেন্দ্রীয় নির্বাহী সদস্য জনাব ফারুক মাহমুদ চৌধুরী, রংপুর জেলা কমিটির সিনিয়র সহ-সভাপতি অধ্যক্ষ খন্দকার ফকরুল আনাম বেঞ্জু, চট্টগ্রাম জেলা কমিটির সম্পাদক এডভোকেট আখতার কবীর চৌধুরী ও খুলনা জেলা কমিটির সম্পাদক এডভোকেট কুদরত-ই-খুদাসহ রাজশাহী এলাকার সমন্বয়কারী সুব্রত কুমার পাল ও বিভিন্ন টক শো-তে অংশ নিয়ে অবাধ, নিরপেক্ষ ও অর্থবহ নির্বাচনের সপক্ষে জনমত সৃষ্টি করেন।